

**KALIKATA LITTLE MAGAZINE LIBRARY-O-GABESHANA KENDRA
18/M TAMER LANE, KOLKATA-700009**

Record No. : KLMLGK 2007/	Place of Publication : <i>৩নং (হাট) রাস্তা, কলকাতা</i>
Collection : KLMLGK	Publisher : <i>প্রবন্ধ (পত্রিকা)</i>
Title : <i>সবুজ পত্র (SABUJ PATRA)</i>	Size : 7.5" x 6"
Vol. & Number : <i>4/6-7</i> <i>9/8</i> <i>4/9</i> <i>4/10</i> <i>4/11</i> <i>4/12</i>	Year of Publication : <i>আমিষন-আমিষন ১৯২৪</i> <i>স্বপ্নময় ১৯২৪</i> <i>(পত্রিকা) ১৯২৪</i> <i>স্বপ্ন ১৯২৪</i> <i>আমিষন ১৯২৪</i> <i>১৯২৪ ১৯২৪</i>
	Condition : Brittle / Good ✓
Editor : <i>প্রবন্ধ (পত্রিকা)</i>	Remarks :

C.D. Roll No. : KLMLGK



বেহিসাবের নিকাশ ।

—ঃঃ—

স্বথস্পৃহা জীবের পক্ষে যতই স্বাভাবিক হোক না কেন, সঞ্চয়-প্রবৃত্তি মানুষের সহজ কিনা—সে বিষয়ে যথেষ্ট সন্দেহের অবকাশ আছে। উক্ত প্রবৃত্তির প্রচারকল্পে পণ্ডিতেরা যখন মধ্যক্ষিকা আর পিপীলিকার দৃষ্টান্ত দিয়ে বিমুখ বা সন্দ্বিগ্ন মনকে অনুপ্রাণিত করতে প্রয়াস পান তখন সঞ্চয়ী লোকের ছল এবং বিষ সম্বন্ধেও কারো কারো মনে স্ততঃই একটা অনুসন্ধিৎসা জেগে ওঠে।

প্রাণিজগতের ঐ সব স্বভাব-সঞ্চয়ী অধিবাসীরাবৃন্দের পদমর্যাদা মানুষের চেয়ে এত বেশী, আর তাদের সঙ্গে আমাদের প্রকৃতিগত এতই বৈষম্য যে, তাদের সংস্কারগত সঞ্চয়পটুতার অনুকরণপ্রয়াসে আমাদের পক্ষে সম্যক সফল-কাম হবার সম্ভাবনা অতি কম! জমান্তরীণ সংস্কারের বশে যদিই বা কেউ এ কার্যে কতকটা সফলতা লাভ করতে সমর্থ হন, তা হলেও সমাজের দিক দিয়ে তার মূল্য যে কেমনতর, আর কতটা—তা নিয়ে তর্ক উঠবার বিলক্ষণ সম্ভাবনা রয়েছে! ছলের ঘা মধুর প্রলেপে সারে কিনা—সমাজ-বৈতণ্য এখনিও তা ঠিক করে উঠতে পারেন নি। সেইজন্মেই হয়ত এবেলা ওবেলা তাঁদের ব্যবস্থা বদলাচ্ছে। কখনো পিঠে হাত বুলিয়ে শিখাচ্ছেন—“সঞ্চয়ী লোক স্থখে থাকে”, আবার পরক্ষণেই কানে পাক দিয়ে বুঝিয়ে দিচ্ছেন—“অর্থই অনর্থের মূল! “সভাপর্কের”

পরে “বনপর্কের” অবতারণা করছেন ;—“অশমেধের” ঘটনার পরে “স্বর্গারোহণের” অন্তর্জালীর ব্যবস্থা দিচ্ছেন !

এই সব অব্যবস্থিততা এবং অনবস্থিতি দেখে শুনে পণ্ডিতেরা স্নহঃস্নহময় সংসারটাকে চাকার সাথে উপমিত করে’ নানান ভাষায় নানান ছাঁদে যে সব দীর্ঘনিঃশ্বাস ত্যাগ করেছেন, বলা বাহুল্য, মীমাংসা তাতে কিছুই এগোয় নি—বরং পিছিয়েছে। অপণ্ডিতেরা তর্ক তুলছে—চাকাই বা হতে গেল কেন? নৌকাও ত হতে পারত! তাহলে ত গড় গড়িয়ে না গিয়ে দিবা তরুতরিয়ে সন্নয়নিয়ে চলত! ছগধের ধূলা-কাদায় অমন নাস্তানাবুদ হয়ত হত না!

মানুষের মনে সঞ্চয়-প্রবৃত্তিটার আরোপ নিশ্চয়ই আদিযুগের কোনো এক বিশ্বামিত্রের কাজ। এতে যদি ঈশ্বরের হাত থাকত তাহলে কি যুগে যুগে দেশে দেশে তাঁর যে সব ওয়ারীশ বা সন্নিক অবতীর্ণ হয়ে তাঁদের স্বহ প্রতীষ্টিত করে গেছেন—তাঁরা এর পরে এত বিরক্তি দেখাতে পারতেন? মহর্ষির অভিপ্রায় সম্ভবতঃ মন্দ ছিল না! কিন্তু বা শাস্ত নয় কালের বশে তার প্রয়োজনের পরি-বর্তন হবেই হবে! সভ্যতার উন্মেষ-উদ্বায় যখন শীতের কাপড়ের চেয়ে শীতের কাঁপুনি অনেক গুণে বেশী ছিল—তখনকার দিনের রোদে পিঠ দিয়ে বসার সার্থকতা এখনকার সামাজিক মধ্যাহ্নে আর ত নেই! তাতে এখন শুধু স্বাস্থ্যহানি আর বর্ণকালিই সার হবে! এখন এই দীপ্ত মধ্যাহ্নে “সঞ্চয়ী লোক স্নহে থাকে” এ মন্ত্রের পরি-বর্তন করে এমন কোনো মন্ত্রের প্রতিষ্ঠা করতে হবে যাতে এই প্রথর রশ্মিহারা প্রত্যাহত হয়ে মুহ আলোকমালায় পরিণত হতে পারে!

(২)

ভবিষ্যতের চিন্তা মানুষের পক্ষে অপরিহার্য, এবং সেদিক দিয়ে দেখতে গেলে ভবিষ্যতের জন্মে সংস্থান-প্রয়াসও যে অবশ্যকরীয় সে বিষয়ে ত কোনো প্রশ্নই উঠতে পারে না! কিন্তু ব্যক্তিগত জীবনে সঞ্চয়-প্রবৃত্তির প্রশ্রয় দিলেই যে উক্ত সামাজিক সমস্যার সমাধান হয়ে যাবে—এমন মনে না করবারও যথেষ্ট হেতু রয়েছে! আমরা প্রত্যেকেই যদি নিজের নিজের কোলে ঝোল টানতে হুহু করি তাহলে, খুব সম্ভব, ঝোলে অচিরেই টান পড়বে। কারণ, বর্তমানের ক্ষিদের চেয়ে ভবিষ্যতের লোভ অনেক বেশী। প্রত্যেকেই যদি আমরা স্বতন্ত্রভাবে আমাদের অন্ধকার ভবিষ্যৎকে রূপচাঁদের আভায় ফুটুটে করতে প্রয়াস পাই তাহলে অনেকের ভাগ্যেই চিরকাল সন্ধ্যের ফুল দর্শন অনিবার্য হয়ে উঠবে। কারণ সঞ্চয়ের প্রবৃত্তি এবং স্নযোগের সন্মিলন আমাদের ভিতরে যাঁর ভাগ্যে জুটবে উক্ত লোভনীয় কার্যে “ইতি” দেবার প্রয়োজনীয়তা কখনো তিনি অনুভব করবেন না।

বর্তমানের সম্ভোগ যতই বেহিসাবী হোক না তার একটা সীমা থাকবেই—পেটকের পেট না ভরলেও তার চোয়াল ধরবে—কিন্তু ভবিষ্যতের সঞ্চয় হচ্ছে অনেকটা অদৃষ্টকে শৃঙ্খলিত করবার চেষ্টা; পুরুষপরম্পরাক্রমে করলেও কোনো দিনও তার পরিসমাপ্তির সম্ভাবনা নেই।

ব্যক্তিবিশেষের অপরিমিত অর্থসঞ্চয়-চেষ্টা যে জাতীয় ধনভাণ্ডার হতে চুরির প্রয়াস সে কথা একটু তুলিয়ে দেখলেই বোঝা যাবে। সমাজের ডালপালা ছেঁটে, তার গলা চেঁচে সঞ্চয়ের হাঁড়ি ঝুলিয়ে দিলে

অনতিবিলম্বেই যে তা তাড়ি হয়ে উঠবে—সে ত অতি স্থিতিশীল।
হয়েছেও তাই! এ সামাজিক অকল্যাণ দূর করতে হলে ব্যক্তিগত
জীবনকে তথাকথিত সঞ্চয়ের নেশা থেকে মুক্ত রাখা একান্ত
প্রয়োজন। যত দিন না সঞ্চয়-প্রবৃত্তির একটা নবতর সংস্করণ সমাজে
প্রতিষ্ঠিত হবে ততদিন “সঞ্চয়ী লোক হুখে থাকে” আর “চুরিবিভা
বড়বিভা” এ দুটা কথায় সময়ে সময়ে বিশেষ কোনোই তফাৎ
থাকবে না!

অনেক সময়ে শুনতে পাওয়া যায় মানুষের মনে সঞ্চয়-প্রবৃত্তির
আধিক্যের ফলেই শিল্প, বাণিজ্য, রাষ্ট্র আদি করে সর্ব্ব বিষয়েই মানুষ
আজ এত উন্নত। একথা ঠিক নয়! পারিপার্শ্বিককে ছাড়িয়ে
উঠবার একটা সহজ প্রেরণা জীবমানদেরই ভিতরে আছে। ঈশ্বরেরছায়
মানুষেতে এর চরম অভিব্যক্তি ঘটেছে। তারি উদ্ভাদনাতেই মানুষ
নিজের মনুষ্যত্ব সব দিক দিয়ে প্রতিপন্ন না করে’ স্থির থাকতে পারে
নি! মানব-সভ্যতার বস্তু আর ছন্দ দুইই নিতান্ত বেহিসাবের মধ্যে
দিয়ে গড়ে উঠেছে। হিসাব মাঝে মাঝে তাতে সুর যোজনা করেছে
মাত্র। (আর তা যে অধিকাংশ স্থলেই বেহুরো বাজছে—সে কথা
বুঝতে হলে হিসাবের কানমলা থেকে কান বাঁচিয়ে চলা নিতান্ত
দরকার)—মানুষের স্বাভাবিক চয়ন-লীলার পরে একটা সুদীর্ঘ
ঘটপটী হিসাবের উপসর্গ চেপেই সঞ্চয়লোলুপতার সৃষ্টি করেছে।
চড়নদারকে ঘোড়ার মালিক বলে’ মনে করলে অনেক সময়েই ভুলের
সম্ভাবনা থাকে—এ ক্ষেত্রেও আমাদের তাই হয়েছে।

সঞ্চয়ের ধর্ম্মই হচ্ছে বর্তমানের বিকাশ এবং ব্যাপ্তির যে মূল্য,
যে পাথের তাই জন্মিয়ে ভবিষ্যতের জগতে পথের সংস্থান। এ যেন

শিশুর আঁটকড়াই থেকে খই চিড়ে তার ভাবী শাশান-বন্ধুদের জগে
তুলে রাখবার ব্যবস্থা। বলা বাহুল্য, এমন হিসাবী অভিভাবকের
হাতে পড়লে সমাজ-শিশুর ভবিষ্যৎ একটুও আশাপ্রদ হত না। কিন্তু
স্বখের বিষয় তা পড়ে নি। হিসাবী লোক ঠিক কখনো “ঘরের খেয়ে
বনের মহিষ” নিরর্থক তাড়াতে যায়? পুষ্করিণীর মৎস্য তার চেয়ে
ঢের বেশী উপাদেয় এবং নিরাপদও বটে। আশু চক্রবর্ত্তির আশা
না থাকলে হিসাবী লোক কোনো কাজে হস্তক্ষেপ করা যুক্তিযুক্ত
মনে করে না। এমন কি রাঁধা-মাছ মারতে পারলে পুকুরের ধারেও
যেতে চায় না। কাজেই এ হেন হিসাবী-তথা-সঞ্চয়ী লোকের কর্ম-
প্রচেষ্টার ফলেই মানব-সভ্যতার বিকাশ হয়েছে একথা অনেকটা
কাকের ডাকাডাকিতেই ভোর এসেছে বলার মতই সুসঙ্গত।

(৩)

মানব-সভ্যতাটা অভাবের তাড়নায় গড়ে ওঠে নি—ওবস্ত স্বভাবের-
প্রেরণাতেই ফুটে উঠেছে। অভাবই যদি কর্মের পক্ষে যথেষ্ট উদ্দীপনা
হ’তো তা’ হ’লে খুব সম্ভব হাঁসেরা আজ পুকুর কাটতে শিখত; গরুরা
কেবলি জাবর না কেটে মাঝে মাঝে আঁটি আঁটি বাসও হয়ত কাটত—
আরো কত কি হ’তো! কিন্তু তা হয় নি—কারণ, ইতর জীবের অভাবের
তাড়নার তুলনায় স্বভাবের প্রেরণা নিতান্তই অস্পষ্ট!—আর মানুষের
অনেকটা তার বিপরীত। মানুষ শুধু অভাব মেটায় না নুতন নুতন
সৃষ্টিও করে। এমন ধারা সৃষ্টি কার্যে তার যে খরচ তা’ যে নিতান্তই
বেহিসাবের বাজে খরচ সে কথা অস্বীকার করা চলে না!

মানব-সভ্যতার নব নব বিকাশশীলতা, নিত্যানব উদ্ভাবনপ্রবণতা ত' চিরদিনই এন্নিধারা বেহিসাবেবর অমুতে অভিযুক্ত হয়ে আসছে। হিসাবেবর উচ্চিক্ষে নিশ্চয়ই তার পুষ্টি হয় নাই। ব্যক্তিগত হিসাব-প্রবৃত্তি আর সহজ সামাজিক বেহিসাবেবর দ্বন্দ্ব যখন হিসাব জয়ী হয়—মানুষের মনুষ্যত্ব স্বতঃই মলিন হয়ে পড়ে।—প্রাথমিক-শিক্ষার অবাধ প্রচলনের প্রস্তাবেবর সাথে সাথেই তখন চাকর মজুরের সম্ভাবিত দুর্খল্যতার আর রায়েত-জনের অবশ্যস্বাবী অবাধ্যতার আশঙ্কা আসে। হিসার ত' চিরদিনই সমাজের পকেট সংস্করণের জন্মেই আগ্রহ দেখিয়েছে।—সমাজের কপালে রাজার টীকা সে ত' বেহিসাবেবরই আঙ্গুল-কাটা রক্তের টিপ্ !

বেহিসাবেবর আতিশয্যের উত্তেজনায় যদি কেউ আঙ্গুল না কেটে নিজের গলাও কেটে বসে তাতে তার ব্যক্তিগত যতই ক্ষতি হোক না, সমাজের উন্নতি-শ্রোতে তা' জলবিষের মতই নির্বিবাদে মিশে যাবে। আর, বেহিসাবেবর প্রতি বীতরাগ হয়ে সমাজে যদি কেবলি সঞ্চয়-প্রবৃত্তির বীজ বপনের কাজ চলতে থাকে তা' হ'লে খুব সম্ভব অদূর ভবিষ্যতে অনেকেই নিজের আঙ্গুল নিরাপদ করতে পরের গলায় ছুরি বসাবে। হত্যা আর আত্মহত্যা এতদ্রুভয়ের কোনোটিই বরণীয় না হ'লেও দুটাই সমান দুঃখীয় নয়। বেহিসাবেবর অবিবেচনার প্রশমন কল্পে সমাজে সঞ্চয়ের কার্পণ্যের পোষকতা কখনো পরিণামদর্শিতার পরিচায়ক বলে মেনে নেওয়া যেতে পারে না। অমিতব্যয়ী বেহিসাবীর যে দণ্ড তা' সেই বহন করে থাকে; আর অপরিমিত সঞ্চয়-লালসার নৈতিক আর্থিক পারমার্থিক সর্বিবিধ প্রায়শ্চিত্ত সমাজের ছোট বড় মাঝারি সবাইকেই করতে হয় !

তবু মানুষের সঞ্চয়ের নেশা ঘোচে না। নেশার ধরনই নাক ঐ ! নেশার ঘোঁকে মানুষ যখন পদে পদে ভূমিসাৎ-ড্রেনজাৎ হতে থাকে তখন তার সন্দেহ হয়—পৃথিবীর ভারকেন্দ্রের অচলতায় আর রাস্তার ধারের ঐ ড্রেনগুলোর স্থিতিশীলতায়।—এ ক্ষেত্রেও আমাদের তাই হয়েছে সংসারের বিকৃতিটাকেই আমরা তার প্রকৃতি বলে ধরে নিয়ে “জীবন এমন ভ্রম আগে কে জানিতরে” তারপরে ইত্যাকার সব কল্পণ-হুরের সারি-গা-মা সাধ্ছি !—উচিত আমাদের জমাখরচের খাতা পুড়িয়ে ফেলে বেহিসাবেবর তরফ থেকে অর্থনীতি-শাস্ত্রের “পরিশোধিত সংস্করণ” বের করা।

মাঘ ১৩২৪।

শ্রীবরদা চরণ গুপ্ত।

জাতীয়জীবনে সাহিত্যের উপযোগিতা ।

(১)

নানা রকমের খেলনা সংগ্রহ করে শিশুরা বড় ঘরবাড়ীর বড় সংসারটির ভিতর তাদের আপনাদের ছোট্ট একটি সংসার পেতে বসে। সেইখানে তাদের পুরো স্বাধীনতা। বৃহৎ একটি সংসারের অভিজ্ঞতার উপর তাদের ক্ষুদ্র সংসারটির প্রতিষ্ঠা বটে; কিন্তু মোটেই তার শাসন-স্বাধীন নয়। সে সংসার তাদের আপনাদের সৃষ্টি। তার মূলে আছে তাদের শিশু-অস্তরের স্বাধীন কল্পনা।

মানুষ তেমনি ভগবানের সৃষ্টির মাঝখানে আপনাদের একটি পৃথক সৃষ্টি গড়ে তুলেছে। মানুষের মনুষ্যত্ব তার ঐ আপনাদের সৃষ্টিতে। আর ঐখানেই মানুষের পূর্ণ স্বাধীনতা। মানুষের সৃষ্টির মূলে যদিও বিশ্বপ্রকৃতির অভিজ্ঞতা আছে, প্রকৃতির শাসন সে সৃষ্টি মানে না। সে সৃষ্টির বীজ-কোষ মানুষের আপনাদের স্বাধীন ইচ্ছা এবং স্বাধীন চিন্তা।

বিশ্বসৃষ্টির সঙ্গে মানুষের সৃষ্টির একটি জায়গায় বেশ একটা মিল দেখা যায়। উভয় সৃষ্টিরই বাইরের একটা রূপ আছে, আর সে রূপের আড়ালে আছে একটা অরূপ শক্তি। বিশ্ব-সৃষ্টির বাইরের রূপ হচ্ছে বিশ্ব-বস্তু, আর তার আড়ালে আছে বিশ্ব-শক্তি। মানুষের সৃষ্টির রূপের পরিচয় মানব-জাতির সভ্যতার বাইরের নিদর্শনগুলোতে, আর সে সৃষ্টির অন্তরের যে শক্তি, সেটা হচ্ছে মানব-মনের চিন্তার ধারা।

৪র্থ বর্ষ, একাদশ সংখ্যা জাতীয়জীবনে সাহিত্যের উপযোগিতা

৬২৫

ঐ চিন্তার ধারা,—বিশ্বমানব-মনের চিন্তার ধারাই মানুষের সাহিত্য। সাহিত্যের উপরই জাতীয়জীবনের প্রতিষ্ঠা; কেননা প্রত্যেক জাতির নতুন নতুন সৃষ্টিই জাতীয়জীবনের গতি এবং সমৃদ্ধির পরিচয়। ঐ সৃষ্টির ভিতরেই জাতির প্রাণের স্পন্দন।

মানুষের দেহটা যখন প্রাণশূন্য হয়ে পড়ে, ভিতরের একটা বিসাক্ত বাষ্পে মুহূর্তের মধ্যে তার বিকৃতি ঘটে। ঐ দূষিত বাষ্প জাতির-অন্তরেও জমে ওঠে, যখন জাতীয় মনের যে চিন্তার ধারা জাতির সাহিত্যে প্রবাহিত হয় তার গতি-বেগ প্রবল এবং অপ্রতিহত না থাকে। গতিই ত প্রাণ। গতি প্রতিহত হলেই প্রাণ বিনষ্ট হয়।

বিসাক্ত বাষ্পের উত্তপ্ত জীবন্ত দেহেও ঘটে, কিন্তু তার আভ্যন্তরীণ রক্ত-শ্রোত বিশুদ্ধ রাখবার জঘ্ন একটি অন্তর-অঙ্গ সর্বদাই নিযুক্ত থাকে। যে রক্ত-শ্রোত অঙ্গ-প্রত্যঙ্গের শিরা-উপশিরায় সঞ্চালিত হয়ে ক্ষণে ক্ষণে দূষিত হয়ে ওঠে; দেহের ঐ অন্তর-অঙ্গটি বাইরের উপাদান এনে প্রতিমুহূর্তে সেই দূষিত রক্ত-ধারাকে শোধন করে। সাহিত্য-প্রতিভা জীবন্ত-জাতিদেহের ঐ রকমের একটি অন্তর-অঙ্গ বিশেষ। বিশ্ব-মনের সঙ্গে জাতীয় মনের যে একটা যোগ আছে বা থাকা দরকার, তা থেকে বিচ্ছিন্ন হলেই, সে জাতীয় মনের বন্ধ আব্বাওয়া বিষিয়ে ওঠে। তখন প্রতিভাবান সাহিত্যিকেরাই সে জাতির অন্তরে বাইরের বিশুদ্ধ হাওয়া সঞ্চালিত করে জাতির জীবন রক্ষা করে। সাহিত্যিকেরাই জাতীয় রোগের প্রকৃত চিকিৎসক।

রোগ-চিকিৎসার একটা নতুন পদ্ধতি আমরা একলে দেখতে পাচ্ছি। ঐ নতুন প্রণালীতে যারা চিকিৎসা করেন, তাঁদের মূল মন্ত্রটি হচ্ছে এই,—
If you think diseased thoughts you attract disease, if

you think healthy thoughts you attract health. এঁরা দেহটাকে ছেড়ে দিয়ে দেহীকেই ধরে বসেন। এঁদের কথা, রোগের যে সব লক্ষণ মানুষের শরীরে প্রকাশ পায়, সেগুলো মনের রোগেরই বাইরের রূপ। এই কারণে চিকিৎসক সন্মোহন-বিভার (hypnotism) বলে রোগীকে যান্ন করে তার মন থেকে রোগ-বিভীষিকা তড়িয়ে স্বাস্থ্যপ্রদ মনোভাব তার অন্তরে সঞ্চারিত করেন। এই প্রণালীর চিকিৎসা ব্যক্তির পক্ষে কতদূর ফলদায়ক তা ঠিক বলতে পারিনে। কিন্তু এ কথা নিঃসন্দেহে বলা যেতে পারে, জাতীয়রোগের চিকিৎসার ঐ একমাত্র পদ্ধতি। জাতীয়জীবনে যখন নানা রকমের বিকৃতি-বীভৎসতা দেখা দেয়, তখন শ্রেষ্ঠ সাহিত্যিকেরা বিচক্ষণ চিকিৎসকেরই মত বিচিত্র সৌন্দর্য্য-সৃষ্টির দ্বারা সমগ্র জাতীয়মনকে মুক্ত করে জাতির অন্তরে আপনার স্বাস্থ্যপ্রদ মনোভাবসকল সঞ্চারিত করতে এবং সমস্ত জাতিকে নব নব উচ্চতর আদর্শে গড়ে তুলতে সমর্থ হন। আপনার মনের চিন্তাধারা সমস্ত জাতির অন্তরে প্রবাহিত করতে সাহিত্যিক যে রীতিটি অবলম্বন করেন, সেইটি হচ্ছে সাহিত্যের আর্ট। জাতীয়-জীবনের উপর সাহিত্যের আর্ট-বস্তুটির প্রভাব কতটা, এবং আর্টের সাহায্যে জাতীয়জীবনের কতদূর উৎকর্ষ-সাধন হয়েছে, সে আলোচনার পূর্বে, আর্টের পরিচয় কি, তার সম্বন্ধে ছ'একটি কথা বলা যাক।

ভিন্ন ভিন্ন সাহিত্যসমালোচক আর্ট সম্বন্ধে ভিন্ন ভিন্ন মত প্রকাশ করেছেন, তার মধ্যে বিশেষ উল্লেখযোগ্য এই তিনটি,—জীবনের ব্যাখ্যা, The interpretation of life; জীবনের আলোচনা, The criticism of life; এবং জীবনের নব নব বিকাশ, The expression of life.

আর্টের একটি সার্থকতা তাহলে এই যে, তাতে আমরা দেখি, নব নব রূপে জীবনের প্রকাশ, অর্থাৎ জীবনের নূতন আদর্শের সৃষ্টি। নূতন আদর্শের প্রয়োজনটা কি, সে বিষয়ে কিঞ্চিৎ আলোচনা আবশ্যিক। কালের শাসন যে কেবল মানুষের রক্তমাংসের দেহটাকে মেনে চলতে হয়, তা নয়, কালের হুকুমে মানুষের পুরোধোগো মনোভাব-গুলোকেও নতুনের পথ থেকে সরে দাঁড়াতে হয়। আর মানুষের মনের আইডিয়া যখন বদলে যায়, তখন জীবনের আইডিয়ালের পরিবর্তন বিশেষ আবশ্যিক। কেননা, মানুষের মনের আইডিয়ার অনুরূপ তার জীবনের আইডিয়াল যদি না হয়, তার অন্তরে বাহিরে একটা বিরোধ ঘটে। মানুষ এ অবস্থাতে আপনাতে আপনার বিশ্বাস হারায় এবং অপরের সঙ্গে ব্যবহারে কপটতা করে। এমনি ভাবে নানা রকমের বিকৃতি তার প্রকৃতিতে ঘটে। এতে করে তার আত্মশক্তি দিন দিন হ্রাস হয়ে আসে। ব্যক্তি ও জাতি উভয়ের পক্ষে ঐ একই কথা, কেননা, ব্যক্তির সমষ্টি নিয়েই ত জাতি।

In the course of life, the outer and the inner remain in incessant conflict and one must therefore arm himself to maintain the ever-renewed struggle,—Goethe নিজের জীবনের অভিজ্ঞতা দ্বারা এ কথাটি বুঝেছিলেন, এবং আপনার অন্তর-বাহিরের দ্বন্দ্ব নিষ্পত্তি করবার যে শক্তি তিনি নিজের জীবনে অর্জন করেছিলেন, তাঁর সাহিত্যের ভিতর দিয়ে সমগ্র জর্মান জাতিকে সেই শক্তি দান করে, জর্মানীর জাতীয়জীবনের অশেষ কল্যাণ সাধন তিনি করেছিলেন। Goethe-র জর্মানীতে জাতীয়জীবনের যে বিকৃতি ঘটেছিল, তার কারণ আইডিয়ার অভাব নয়, অশরীরী

আইডিয়ার জীবন্ত সাকার-মূর্তির অভাব। নতুন নতুন আইডিয়াতে দেশের আকাশ ছেয়ে গিয়েছিল! কিন্তু জীবনের ক্ষেত্রে সেই আইডিয়াকে প্রয়োগের সময় জর্মান্জাতির সঙ্কোচ এবং দুর্বলতার অবধি ছিল না। ফরাসীদেশে নব ভাবের যে বান এসেছিল, তার তরঙ্গ-উচ্চাস সে দেশের সীমানা অতিক্রম করে জর্মান্জাতিতে এসে পৌঁছেছিল। জর্মান্জাতি-দার্শনিক ও বৈজ্ঞানিকদের নূতন নূতন উদ্ভাবনের সঙ্গে সঙ্গে জাতির মনে একটা বিরাট পরিবর্তন এসেছিল। জর্মান্জাতি-সমালোচকেরা পুরাতন আচার-বিচার, রীতি-নীতি-পদ্ধতির তীব্র সমালোচনা করতে শুরু করেছিল। নূতনের আক্রমণে জাতীয় মনের পুরাণে আইডিয়াগুলো অন্তর্হিত হয়েছিল। কিন্তু নূতন আদর্শের অভাবে জীবনের পুরাতন আদর্শের খোলসটা রয়েই গিয়েছিল। জাতির নবীন মন জীবনের পুরাতন আদর্শের বিধি-বিধানের শিকলে বাঁধা পড়েছিল। তাতে রুদ্ধগতি রক্তস্রোতের মত ঐ রুদ্ধমনের চিন্তাধারা দূষিত হয়ে উঠেছিল। এই অবস্থায় থেকে জর্মান্জাতিকে রক্ষা করেন Goethe, Schiller, Heine প্রভৃতি সাহিত্যিকেরাই। তাঁরা এই নতুন আইডিয়াগুলোকে পরিপূর্ণ স্বাধীনতা, আশ্চর্য্য স্পষ্টতা এবং অপূর্ণ মৌলিকতার সহিত সাহিত্যের মধ্যে প্রকাশিত করেন। এঁরা নতুন নতুন ভাব নিয়ে জীবনের নূতন আদর্শ সৃষ্টি করে জর্মান্জাতির স্রমুখে খাড়া করেন। Goethe-র অধিকাংশ চরিত্রই ত নিরাকার আইডিয়ার জীবন্ত সাকার রূপ।

দর্শন বিজ্ঞানের নতুন নতুন তথ্য আবিষ্কারের সঙ্গে সঙ্গে মানুষের মনের যে অভিব্যক্তি ঘটেছিল, তার অনুরূপ জীবনের নতুন আদর্শ যে জর্মান্জাতি-সাহিত্যে গড়ে উঠেছিল, সে সাহিত্য যে মঙ্গলের সৃষ্টি, তার

প্রমাণ Goethe-র এই বাক্য,—It may now without arrogance be asserted that German Literature has effected much for humanity that a moral-psychological tendency pervades it, introducing not ascetic timidity, but a free culture with nature and in cheerful obedience to Law.

(৩)

একটি কারণ দেখানো গেল। নতুন হাঁচে জীবনের আদর্শ গড়ে তোলবার প্রয়োজন আরো অনেক কারণে প্রত্যেক জাতির ভিতরেই দেখা যায়। পারিপার্শ্বিক ঘটনার সংঘাতে, অথবা ভিতরের অবস্থার পরিবর্তনে, অনেক সময় জীবনের সনাতন পথটি রুদ্ধ হয়ে আসে, তখন জাতির কল্যাণ নতুন পথের সৃষ্টিতেই। কেননা, আত্মপ্রকাশের সহজ পথটি যখন নেই, তখন মানুষের পক্ষে চোরাগলির অনুসন্ধান ফেরাটা বড় অস্বাভাবিক নয়। ঐ অবস্থাতে জাতির অন্তরে হীনতা এসে পড়ে। আর সেই হীনতা যাদের মন আছে তাদের মনকে পীড়া দেয়; মানুষের দুঃখ তাঁদের মনকে কষ্ট দেয়—কিন্তু তার চাইতে বেশী কষ্ট দেয় মানুষের অবনতি। প্রাণের ঐ বেদনা থেকেই সাহিত্যিকদের অন্তরে আসে সৃষ্টির তাগিদ। তাঁদের সৃষ্টি জাতির মঙ্গল সাধন করবেই, কেননা সে সৃষ্টির গোড়াতে আছে মায়ের প্রাণের মঙ্গল-কামনা।

যাঁদের অন্তরের সম্বল কেবল স্পর্ধা, তাঁদের উপর সমাজের শাসন-ভারই অর্পিত হয়েছে, তাঁরা চান কেবল চোখ রাঙ্গিয়ে মানুষের

প্রাণটাকে দমন করতে। পরের দুঃখে তাঁদের অস্তরে ব্যথা বাজে না। বেদনা-বোধ তাঁদের নেই। অপরপক্ষে আত্মপ্রকাশের সনাতন পথগুলো রুদ্ধ হয়ে আসাতে, জাতির প্রাণটা যখন হাঁপিয়ে মরবার উপক্রম হয়, তখন যে মণীষীরা নতুন পথ গড়বার শ্রম স্বীকার করেন, সাহিত্যে যীরা জীবনের নতুন নতুন আদর্শ সৃষ্টি করেন, পরের দুঃখটা তাঁরা আপনাই বোধ করেন। পরের অধোগতিতে তাঁরা নিজেদের অপদস্থ মনে করেন। স্তরাত্তর তাঁদের সৃষ্ট সাহিত্য জাতীয় জীবনের হিতসাধন এবং জাতীয় মনের ঐশ্বর্যবর্ধন যে করবে, এ ত ধরা কথা।

একটা উদাহরণের দ্বারা এ মতের সমর্থন করা যাক। যুরোপীয় সাহিত্যে জীবনের আইডিয়ালের একটা পরিচয় খ্রী-পুরুষের ভিতরে সখ্যভাবের (friendly comradeship) আদর্শে। যৌনসম্বন্ধ যখন এই নব আদর্শের প্রতিষ্ঠাভূমি নয়, তখন দেহের আকর্ষণ এই মিলনের কারণ হতে পারে না। মনের শক্তি সৌন্দর্যের আকর্ষণে মানব-মনের সঙ্গে মানব-মনের মিলনই হচ্ছে এই নব আদর্শের ভিত্তি। এখন এই আদর্শের কি প্রয়োজন, এবং এতে করে জাতীয় জীবনের কোন কল্যাণ সাধিত হয়েছে, তার সম্যক আলোচনা করবার সামর্থ্য আমার অবশ্য নেই, তবে মোটামুটি দু' চারটি কথা বলতে পারব, এ ভরসা আছে।

মানব-প্রকৃতি জড়-প্রকৃতির নিয়মাবলি, এই সিদ্ধান্তে আন্বাবান একজন জর্মান জড়বাদী খ্রী-পুরুষের ভিতর যে প্রাণ, তাকে বিলিষ্ট করে দেখিয়েছেন, অণু-পরমাণুতে যে কারণে রাসায়নিক যোগ সংঘটন হয়, ঐ প্রাণের মূলে সেই একই কারণ বর্তমান। জর্মান পণ্ডিতের মতটি আমি অগ্রাহ্য করিনে। কিন্তু এখানে আমার বলবার কথা এই

ভাঙ্গুর তাঁর যে মানসী মূর্তি পাথর খুঁদে বের করলেন, তার দিকে আমরা যখন চাই, পাথরটাই কি তাঁর ভিতর আমাদের কাছে সত্য-বস্তু বলে মনে হয়, না ভাঙ্গরের কল্পনাই সেখানে সত্যরূপ ধারণ করে? খ্রী-পুরুষের যে প্রাণ, তার মূলে যাই থাক, বর্তমানে তার শোভা-সৌন্দর্য্য, ঐশ্বর্য্য-সম্পদ মানুষের মনের জিয়ারই ফল। মূলে যার সৌন্দর্য্যের অভাব তাকে সুন্দর শোভন করে তুলবে, এ সামর্থ্য সাহিত্যের আছে। আমাদের ভিতর যেটা কুৎসিত, সেটাকে শ্রীযুক্ত করবার ভার সাহিত্যের উপরই ছাড়া। কারণ সাহিত্যের উদ্দেশ্যই হচ্ছে ইহলোকের মালমসলা নিয়েই আর একটি কল্পলোকের সৃষ্টি করা—যে লোক এই মাটির পৃথিবীর চাইতে ঢের বেশী সুন্দর ঢের বেশী সত্য এবং ঢের বেশী অক্ষয়।

সাহিত্য ব্যক্তির মনকে যে ঐশ্বর্য্য দান করেছে, তাতে জাতীয়-মনের সৌন্দর্য্য এবং সম্পদ বেড়েছে। এরপর গোটা জাতিটার উপরেও সাহিত্যের প্রভাব যথেষ্ট আছে। যে গণতন্ত্রী শাসন-প্রণালী, আজকের দিনে ইউরোপে প্রতিষ্ঠিত হয়েছে, সেই ইউরোপের এমন দিন ছিল, যখন তার কাছে ওটি স্বপ্নের চেয়েও অলীক ছিল। দরিদ্রজনসাধারণের কাছে সে দেশের ধনী জমিদার 'ধর্ম্মাবতার প্রবল প্রতাপাবিত' ছিল। মানুষের সঙ্গে মানুষের এই অস্বাভাবিক ব্যবধান, ইউরোপের সাহিত্যিকেরাই দূর করেছেন। তাঁরাই সাম্য-বাদের উপর গণতন্ত্রের ভিত্তি স্থাপন করেছেন। তারপর মধুসূদন, হেমচন্দ্র, বঙ্কিমচন্দ্র, নবীনচন্দ্র, রবীন্দ্রনাথ, বিজয়লাল প্রভৃতির সৃষ্ট সাহিত্য বিগত ৪০ বছরের মধ্যে আমাদের জাতীয়মনে যে পরিবর্তন উপস্থিত করেছে, তা চোখ মেলে চাইলেই দেখতে পাওয়া যায়।

(৪)

সাহিত্যে পাওয়া যায় ভাবীজীবনের পূর্ববাঁধ। এমন একদল লোক সকলদেশেই আছেন, সাহিত্যের ঐ নূতন আইডিয়ালটাকে যারা শনিতর অবতার মনে করেন। এঁদের সাধ বেশ আয়েস করে চিরপুরাতনের গুহায় ঘুম দেন। নতুনকে বরণ করে নেবার শ্রম-স্বীকার এঁদের খাতে নেই। কিন্তু মানুষ আপনার খুসিতে যদি চলতে না শেখে, কালের কষাঘাতে একদিন তাকে নতুনের পথে এসে দাঁড়াতেই হয়। কালের ধর্মে যেটা একদিন আসবেই সাহিত্য তার পূর্বপরিচয় যদি করে দেয় তাতে দোষ কি? বরণ জ্বিখেই আছে। নতুনের সঙ্গে যেদিন সাক্ষাৎ হবে, সেদিন তাকে আমরা সম্পূর্ণ অপরিচিত মনে করে ভয় পাব না, তার সঙ্গে যে আমাদের আগে থাকতেই পরিচয় হয়ে গেছে এইটে দেখে খুসি হয়ে তাকে বরণ করতে পারব। সেই অনাগত বন্ধুর দ্বাররোধ করে নিজেদের কল্যাণকে বিমুখ করব না। আর কালের গতি যে বড়ই কুটিল, প্রতিকাজ-কর্মে আমাদের এ অভিযোগ খাড়া করতে হবে না।

সমাজের প্রায় সকল-ক্ষেত্রেই ত দেখছি, নূতন-পুরাতনের একটা দ্বন্দ্ব চলছে। পিতা-পুত্রের শাস্ত্রী-বধুর আইডিয়ালর গরমিল থাকতে মনের অমিল ঘটেছে। নবীন প্রাচীনের শাসন মানছে না। প্রাচীন নবীন প্রাণের আব্দার সইছে না। এতে করে সমাজের ভিতর অশান্তির সৃষ্টি হচ্ছে। আর দোষারোপ হচ্ছে কাল-বেচারীর উপর, যেহেতু তার একটা গতি আছে। চিরপুরাতনের মধ্যে সে আবদ্ধ থাকতে পারে না। নূতন নূতন পথ বেয়ে তাকে চলতে হয়। জাতীয়মানে নূতন-পুরাতনের বিরোধটা বড় বেশী সামাজিক হয়ে উঠতে পারে না, যদি সাহিত্য পূর্ব হতে এসে পুরাতনকে নব-মস্ত্রে দীক্ষিত করে।

অনেক ক্ষেত্রে সাহিত্যের বিরুদ্ধে এই একটি অভিযোগ উপস্থিত করা হয়, যে সাহিত্য জাতীয়জীবনে দুর্গতির প্রশ্রয় দেয়। সকল ফুলেই অভিযোগটি যে একেবারে মিথ্যা, সে কথা অবশ্য বলিলে। তবে অধিকাংশ স্থলেই এ অভিযোগের মূলে কোন সত্য নিহিত থাকে না। যাদের এ অভিযোগ তাঁদের প্রকৃতি—যাঁরা চরিত্রের কলঙ্ক রটবে এই আশঙ্কায় চিকিৎসকের কাছে আপনার ব্যাধি গোপন রাখেন, যে পর্যন্ত না ভীষণ আকারে তা দেখা দেয়,—ঠিক তাঁদেরই মত।

যাঁরা প্রতিভাবান সাহিত্যিক তাঁদের একটা গুণ, তাঁদের প্রাণের সরলতা। তাঁদের অন্তর-বাহির একেবারে স্বচ্ছ। মানুষ ভিতরের কলুষ গোপন রেখে, বাইরে সাধু সাজবে এ রূপটতা তাঁদের চক্ষুঃশূল। তাই জাতিরও অন্তরের যে গলদ, সাহিত্যিক সেটাকে সমাজের সাম্নে ধরে তার আলোচনা করেন। কিন্তু অনেকেরই সাধ, আত্মগোপন করে, বাহিরে সাধু সাজেন।

তারপর সমাজ-কর্তাদের সঙ্গে সাহিত্যিকদের একটা বিরোধ অনেক সময় দেখা দেয়। উভয়-পক্ষের উদ্দেশ্য এক হলেও, পথটা অনেক সময় বিভিন্ন। অজ্ঞতার অন্ধকারে মানুষের স্বভাবটাকে মানুষের কাছে গোপন রাখবে, এ সাহিত্যিকদের অভিপ্রায় নয়। তাঁদের কথা, আইডিয়ালর-বলে মানুষের অন্তরটাকে যখন ফুলিয়ে ফাঁপিয়ে তোলা যায়, তখনই মানুষ আপনার স্বাভাবিক দুর্বলতা ছাড়িয়ে অনেক উর্ধ্বে উঠতে সক্ষম। সাহিত্যিক তাই, অসাধ্য-সাধনের লতগ্রহণে মানুষের মনকে আহ্বান করেন। সাহিত্যিকদের কাছ থেকে এর একটা উদাহরণ নেওয়া যাক।

Goethe তাঁর Affinities বইতে মানুষের প্রকৃতিকে যেন রাসায়নিক প্রণালীতে বিশ্লিষ্ট করে, তার ভিতরের হীনতা দুর্বলতা

মানব-সমাজের স্রুক্ষে ধরলেন। কিন্তু Goethe কি বাস্তবিকই সমাজে দুর্নীতি প্রচার করলেন? তিনি দেখালেন, মানুষ যখন আপনার প্রকৃতির দাসত্ব করে, তখন তার অধোগতি কতদূর সম্ভব, আর ইচ্ছাশক্তির বলে মানুষ আপনাকে ছাড়িয়ে কত উর্দ্ধে উঠতে পারে। Edward ছিল স্বীয় প্রকৃতির দাস, কিন্তু Edward ত Goethe-র আদর্শ-চরিত্র নয়। মানুষ আপনার প্রকৃতির দাসত্ব করবে, এ শিক্ষা Goethe কখনও দিতে পারেন না। কেননা, Goethe-র কথা,—Man alone

Can achieve the impossible.

Goethe-র শিক্ষা মানুষ তার ইচ্ছাশক্তির বলে, অসাধ্যসাধন করবে। ঐ অসাধ্যসাধনেই মানুষের মনুষ্যত্ব। Goethe-র যা শিক্ষা, সেই একই শিক্ষা বিভিন্ন দেশের সাহিত্যিকেরা দিয়েছেন। তাঁরাই মানুষকে আকাশ-কুহুমের স্বপ্ন দেখিয়েছেন, আর সে আকাশ-কুহুম লাভ করবার উৎসাহ-উদ্দীপনা মানুষের অন্তরে জাগিয়েছেন। মানুষ-ব্যক্তি বা জাতি হিসেবে যে উন্নত হয়েছে, সে তার আশা-কুঁড়ের দিকে নজর রেখে নয়, আকাশ-কুহুমে লক্ষ্য রেখে। আকাশের কুহুম হয়ত আকাশেই রয়ে গেছে, কিন্তু তার লাভের সাধনা থেকে মানুষ শক্তি পেয়েছে,—আপনার পশুত্বের সীমা অতিক্রম করে, দেবত্বের উচ্চতর লোকে অগ্রসর হতে।

It is the striving after, not the attaining of ideals, that is the motive-power behind human endeavour. Ideals recede farther and farther as we advance, but we rise towards the stars as we seek them—অস্বাধিকারিত

যখন আকাশ-কুহুমে বিশ্বাস হারিয়েছিল, Schiller তার কানে এই মন্ত্র দিয়েছিলেন।

(৫)

এতক্ষণ যে কথা বললাম, সেটা বিশেষ করে সাহিত্যের সৃষ্টির দিকটা নিয়ে, তার আর একটা দিক আছে, সেটি হচ্ছে ধ্বংসের দিক। Criticism of life, বা জীবনের সমালোচনা,—আর্টের এই লক্ষণটি বেশী স্পষ্ট হয়ে সাহিত্যের এই দিকটায় ফুটে ওঠে। জাতীয়-জীবনের সঙ্গে সাহিত্যের এই ধ্বংসের দিকটার কি সম্বন্ধ তার আলোচনা করা যাক।

মানুষের মনের সম্পদ রক্ষা এবং বৃদ্ধি করবার ভার সাহিত্যের হাতে। তবু মানব মনকে সবল ও সূত্রী করে গড়ে তুলতে হলে, মানুষের ভিতরের জীর্ণতাতে আঘাত করে, পুরাতনকে ধ্বংস করতে হয়। ওটি ভগবানেরই বিধান, কেননা তিনি তাঁর বিশ্বপ্রকৃতির সৌন্দর্য রক্ষা করবার জন্ম কেবল যে সৃষ্টিকর্তা হয়ে নতুনের সৃষ্টি করছেন তা ত নয়, পুরাতনকে ধ্বংস করবার জন্ম সংহার মূর্ত্তি ও ধারণ করছেন। সাহিত্যেও ঐ দেবতার আবির্ভাবের বিশেষ প্রয়োজন, কেননা পুরাতনকে ধ্বংস না করলে, সেখানে নতুনের সৃষ্টি জীর্ণ-বাড়ির নতুন রঙ-ফেরানো মাত্র হবে।

বাহির থেকেই এ-সাহিত্য তার শক্তি-অর্জন করে। জাতির আপনার গণ্ডির ভিতর, বন্ধ এবং দূষিত আব্বাওয়াতে এ সাহিত্য পুষ্টি এবং পরিবর্ধিত নয়। বিশ্বের জ্ঞান এবং অভিজ্ঞতার উপাদানই এ সাহিত্যের সৃষ্টি। এ সাহিত্যের উদ্দেশ্য দেশবাসীর মনোরঞ্জন করা

নয়, আঘাত করাই এ সাহিত্যের কাজ,—জাতির অন্তরে যেখানে হীনতা, কপটতা এবং সঙ্কীর্ণতা, সেইখানে আঘাত করা। এ সাহিত্য যাঁদের স্বষ্টি, তাঁদের বিরুদ্ধে সকল দেশই এই অভিযোগ খাড়া করা হয়, যে তাঁরা স্বদেশ-দ্রোহী, স্বজাতি-বিশেষী। Goethe যখন তাঁর স্বজাতির মনে আঘাত করেছিলেন, তাঁর বিরুদ্ধেও ঐ অভিযোগ আনা হয়েছিল। Goethe তার যে জবাবটি দিয়েছিলেন, আমার মনে হয়, এঁদের সকলের পক্ষ হতে ঐ একই জবাব দেওয়া যেতে পারে,—What is meant by love of one's country? If the poet has employed life in battling with pernicious prejudices, in setting aside narrow views, in purifying the tastes of his countrymen, what better could he have done?

দেশের প্রতি অন্ধভক্তি যাঁদের আছে, তাঁরাই দেশের যথার্থ হিতসাদক নন। জাতির মঙ্গল-সাধন তাঁদের দ্বারা হয় না, যাঁরা জাতির অন্তরের যত কলুষ চাপা দিয়ে রেখে, শতমুখে তার প্রশংসা করেন। দেশবাসীর অন্তরের সঙ্কীর্ণতা দূর করবার, এবং জাতীয় মনের হীনতার উপর আঘাত করবার শক্তি যাঁদের আছে, তাঁরাই দেশের বা জাতির পরমমিত্র। আমার ত ধারণা, জাতীয়জীবনের Sanitation-বিভাগের কাজ-কর্ম তখনই বেশ সূচার-রূপে সম্পন্ন হতে পারে, যখন তার portfolio সাহিত্যের প্রায়-দেবতা এসে হাতে নেন। এ সিদ্ধান্ত আমার কোন যুক্তির বলে, তা নির্দেশ করছি।

অনুসন্ধান করলে দেখা যায়, জ্ঞান-বিজ্ঞানের উৎকর্ষ-সাধনের সঙ্গে সঙ্গে প্রত্যেক জাতির ধর্ম এবং সামাজিক জীবনের অনেক বিধি-বিধান এবং প্রথা-পদ্ধতির প্রাণ-বিনাশ হয়েছে, কিন্তু তাদের জায়গাটি জুড়ে

তাদের শব পড়েই রয়েছে। এর কারণ কি, তার উত্তর দেবে, যাঁরা মৃত-দেহের সংকার কখনও করেছেন, তাঁদের আপনার অভিজ্ঞতা। মানুষের মৃত্যুর পর, তার শবটার উপর তার আত্মীয়-স্বজনের মায়া বড় কম নয়। কিন্তু সে মায়াকে কাটিয়েও সে দেহের সংকার করতেই গৃহের মঙ্গল।

যে সব সাহিত্যিক, জাতির মঙ্গলের জঘ জাতির অন্তরে আঘাত করেন, তাঁদের তুলনা,—যাঁরা মায়ের প্রাণে তীব্র-বেদনা দিয়ে মায়ের কোল থেকে মৃতশিশুটিকে কেড়ে নিয়ে যান শ্মশানে তার সংকার করতে,— তাঁদেরই সঙ্গে। যখন দূষিত বাষ্পে জাতীয়মনের আবহাওয়া বিধিয়ে ওঠে, তখন ঐ শ্রেণীর সাহিত্যিকেরাই জাতির মানস-পুত্র এবং মানস-কথাধারের মৃতদেহের সংকার করে জাতীয়জীবনের মঙ্গল সাধন করতে সমর্থ।

(৬)

সাহিত্যে আর এক প্রকারের শ্রেণীবিভাগ আছে। মানব-প্রকৃতির যেমন দুটো দিক আছে, ভাবের এবং বুদ্ধির দিক। মানব-মনের স্বষ্টি, সাহিত্যেরও তেমন দুটো দিক, একটি হচ্ছে তার ভাবের দিক, আর একটি হচ্ছে বুদ্ধির দিক।

ভাবের প্রাচুর্য যে সাহিত্যের ঐশ্বর্য—তার সম্বন্ধে দু'চারটি কথা বলা আবশ্যিক। একদল সমালোচক আছেন, ভাবপ্রধান সাহিত্যকে তাঁরা বাহুল্য-স্বষ্টি মনে করেন। তাঁদের মত, এ সাহিত্যের দ্বারা জাতীয়জীবনের কোন মঙ্গল সাধন হতে পারে না। এঁদের এই মতের সত্যাসত্য বিচার করে দেখা দরকার মনে করি।

ভগবানের এই বিশ্বসৃষ্টির সম্বন্ধে একটি মত প্রচলিত আছে, সেটিকে anthropocentric dogma বলে; যাঁরা ঐ ভগ্নমাটি মেনে চলেন, তাঁদের ধারণা একমাত্র মানবজাতির জন্ম ভগবান এই বিশ্ব-প্রকৃতি রচনা করেছেন। এই হেতু তাঁদের পক্ষে এটা খুব স্বাভাবিক হবে, যদি বিশ্বের যে যে বস্তু মানবজাতির কোন কাজে না আসে, সেগুলোকে তাঁরা ভগবানের বাহ্যল্য-সৃষ্টি মনে করেন। ভগবানের বিরুদ্ধে ঐ বাহ্যল্য-সৃষ্টির অভিযোগ মানুষের অন্তরে আছে কিনা, তা জানিনে, প্রকাশভাবে সে অভিযোগটি উপস্থিত করতে কেউ কোন দিন বোধ হয় সাহস করেন নি। কিন্তু কবি যে কাব্য লিখলেন, তা যদি কোন সমালোচকের অভিরুচির অনুরূপ সৃষ্টি না হয়, তখনই সে কবির বিরুদ্ধে সমালোচক অভিযোগ উপস্থিত করেন।

ধরুন, কোন কবির অন্তরে ভাবের খুব প্রাচুর্য। তিনি অন্তরের ভাবে বিভোর হয়ে প্রাণের কথা শোনালেন, যাঁদের প্রাণ আছে তাঁদের। আর সমালোচক,—যাঁর বুদ্ধির দিকটায় জোয়ার এসে থাকবে, কিন্তু ভাবের দিকটায় হয়ত ভাটা পড়েছে, কবির সঙ্গে প্রকৃতিগত অনৈক্য বা রুচির বৈষম্য ঘটায় কবির সৃষ্টিকে তিনি নিরর্থক মনে করলেন। কিন্তু একমাত্র মানবজাতির জন্ম যেমন ভগবানের সৃষ্টি নয়, কবির সৃষ্টিও তেমনি কোন ব্যক্তিবিশেষের কিম্বা কোন উদ্দেশ্যবিশেষের জন্ম নয়। সমালোচক, কবির যে সৃষ্টিকে নিরর্থক মনে করলেন, জাতির কাছে তার যদি কিছুমাত্র সাংগন্ধতা থাকে, তাহলে তাকে বাহ্যল্য-সৃষ্টিমাত্র মনে করা সঙ্গত নয়।

জাতির দিক থেকে এইবার বিচার করা যাক। জাতি অর্থে ত ভিন্ন ভিন্ন প্রকৃতির ব্যক্তির সমষ্টিকে বোঝায়। ভিন্ন ভিন্ন প্রকৃতির

বহুম, কেননা, রুচি ও প্রকৃতির বৈচিত্র্য মানুষের ভিতর চিরদিনই আছে এবং ভবিষ্যতেও থাকবে। সমালোচকের যে প্রকৃতি ও ধর্ম, তার সম্পূর্ণ বিপরীত প্রকৃতির এবং ভিন্নধর্মী ব্যক্তি জাতির মধ্যে অনেকেই থাকবেন, এটা বড় আশ্চর্য্য কথা নয়। ভাবের দিকটাই যাঁদের অন্তরে প্রবল, ভাবের দিক থেকে যে সাহিত্যে সৃষ্টি, সেই সাহিত্যই তাঁদের পরম সম্পদ। কবির কাছে প্রাণের কথা না শুনলে এঁদের অন্তরাত্মা গুম্বরে মরে। ভারের প্রাবল্যহেতু কবির সৃষ্টিকে বাহ্যল্য-সৃষ্টি জ্ঞান করে দেশ থেকে কোনজাতি যদি তাকে নিরাসিত করে, তাহলে সে জাতির গড়ন কখন সর্বদ্বন্দ্বহীন হতে পারে না। দেহের শ্রী তার প্রতি অঙ্গের সৌষ্ঠবে, একটি অঙ্গ যদি খর্ব্বাকৃতি হয়, তাতে সকল দেহের শ্রীহানি হয়। জাতীয়মনের একটা দিক যদি শুকিয়ে যায় আর একটা দিক যদি ফুলে ওঠে, তাহলে সে মনের চেহারা সুসঙ্গত এবং সুন্দর হতে পারে না। জাতির সভ্যতা তখনই পূর্ণাবয়ব হয়ে উঠবে, যখন তার সাহিত্যের সকল দিকের সমান উৎকর্ষ সাধিত হবে। সাহিত্যের সঙ্গে জাতীয়জীবনের সম্বন্ধ কোন একটা দিকের সম্বন্ধ ত নয়; জাতির রাষ্ট্র, ধর্ম এবং সামাজিক জীবন, তার আভ্যন্তরীণ যে শক্তির বলে সুস্থ সুশ্রী এবং সবল হয়ে ওঠে, সাহিত্যই সেই শক্তির আধার।

শ্রীবীরেখর মজুমদার।

হৈরা ।

(মাণিকগঞ্জের মৌখিক ভাষায় লিখিত)

মা-বাপমরা ছোট ছাওয়ালটারে যেদিন গায়ের একজন গিরন্ত লোক মাসির বাড়ীতে আইনা দিয়া গেল, সেইদিন থিকা তার মাসি সেই হাড়িসার ছোট ছাওয়ালটার ক্যাবল যে আশ্রয়স্বরূপ হৈল তা না,—বেওয়া বিধবা মাসির অপায়া সংসারটাও যান একটা কিছু হাতের সামনে পায়া আস্তে ধীরে গুছায়া উঠব্যারু লাইগল। বাপ-মায় কি বৈলা যে ছাওয়ালটারে ডাইকৃত, আইনা-দেওয়া লোকটা তা কিছুই কইব্যার পারে নাই। দিন চাইরেক কোকন বৈলা ডাইক্ব্যার পরে মাসির মনে বইনপুতের একটা নাম মন-উন্তেই জোয়ায়া উঠল; সে বইনপুতের নাম রাইখল গয়ানাথ। ইস্তককাল গয়ার পিণ্ডির কথা মনে হৈতে মাসি তিনকুল বিচরায়্যা কাক প্রাণীডাও পাইত না, বৈতরণী পার হওয়নের কথা মনে হৈলে তার নিলক্ষের চক্ষু ভয়ে বৃহজ্যা আইসৃত।

একেই ত বইনপুং, তাতে আবার স্বগোত্তর কাজেই গয়ানাথের হাত দুইখানিরে রাইমণি ক্যাবল হাতই মনে কৈরত না, পিণ্ডির আধার বৈলা সে হাতে সোয়াগু কৈরা সোনার বয়লা পরায়্যা দিল। মান্বে কইতেই কয় যে কোনতারই বাইড় ভাল না। ইন্ধেত্রে সে কথা হাতে হাতেই কইলল। মাসির দিন রাইত আচালা সোয়াগে গয়ানাথ খুব একজন আল্লাইদা ছাওয়াল হইয়া উঠল। পাড়ার

ছাওয়ালগোরে যার হাতে যা দেখে মাসির কাছে কান্দন জুইড়া দিয়া তাইই আদায় কইয়া নেয়। এই ভাবে পনর বছর পার হওয়নের পর সে যখন বেশ ডাঙর হইয়া উঠল তখনো তার পড়া-শুনার নামগন্ধও তার নিজের কি তার মাসির কেউরই মনে উদয় হৈল না। ছাওয়াল-পাওয়ালের পড়ন-শুনন কোন কালেই আপন গরজে হয় না মুক্বিবর উর্যোগেই হইয়া থাকে। গয়ানাথের এক-মাত্র মুক্বিব মাসি। তার ধারণা যে লেখন-পড়ন শিখন লাইগ্ব এক যারা বিধি-বিধান দেয় আর যারা চাকুরী কইয়া খায়, মাত্র তাই গোরে। রাইমণির জোত জমার যা আয় তাতে তার সংসারে খরচ-পত্র ভালয়ালে কুলায়াও কিছু কিছু উবুরত। এই ভাবে কি বছরের অল্পবিস্তর বাড়তি রাইমণির হাতে জইমতে জইমতে তার একটু তেজারতি কার্ণারও জাঁক্যা উঠছিল। স্তত্রায় বইনপুতের লেখন পড়ন শিখানের কথা মাসির যে মনেই হইত না ইয়াতে আচম্বিং হওয়নের কারণ কিছুই নাই। কিন্তু তাই বৈলা ঘর-গিরন্তালির কামকাজ ও আওয়ং বিয়ং শিখান মাসির নজর একটুও এড়ায় নাই। নিজের স্বার্থ বৃহজ্যা নিতে রাইমণি অপটু আছিল না কিন্তু ক্ষাণে ক্ষাণে দেখা যায় বাশের থিকা কঞ্চি দর, গয়ানাথের সম্বন্ধে ই-কথাটা একিকালে কাপে কাপে খাইটত। মাসির শিক্ষাগুণে বইনপুং আখরে অজ্ঞান খাইক্যাও আখেরের চুর্যাস্ত জ্ঞানী হইয়া উঠল—ঘরের খাইয়া বনের মইষ সে কোন কালেই খাদায় নাই।

রাইমণির সংসারে এক মাত্র চাকর হৈরা। গয়ানাথ যখন ই-বাড়ীতে আইসে নাই তার আগের থিকা সে রাইমণির চাকর। এখন তার বয়েস হইচে বৈলা রাইমণি তারে বেশী কিছু ফর ফরমাইস

পার্ধ্যামানে দিত না কিন্তু গয়ানাথের বুদ্ধি বাড়নের লগে যেমুন তার কর্তীগিরি বাইরা উর্হব্যার লাইগ্ল, হৈরার খাটুম্নীও সেই সাথে সাথে কমনের বদলে দিনে দিনে বাইরাই চইল্ল। বইনপুতের আইসনের আগে নিসন্তান রাইমণির একটু স্নেহ এই হৈরা দখল কইরতে র্যাং করে নাই, তাই তারে অতিরিক্ত মেহানং কইরতে দেইখলেই রাইমণির কাছে অসহ ঠেইকত। কিন্তু গয়ানাথ হৈরার বিনাকামে বইসা থাকন একিব্যারেই দেইখার পাইরত না। এই অনুজরের চাকরটারে নিয়া ই-দাইনকে মাসি বইনপুতের মধ্যে এক আধটু বগড়া কাটির সুরু হৈব্যার লাইগ্ল। হৈরা মানুষটা আছিল বুদ্ধিতে কিছু খাটো কিন্তু তার বৃকের পাটাটা আছিল খুব বড় আর কৈল্জাটা খুব নরম। ধারে কাছে গিরন্তলোকের ফ্যারে অফ্যারে তার শীত গীরিঞ্জি জ্ঞান ধাইকত না।

যে কালের কথা কওন হইতাছে সে আছিল ফাল্গুন মাস। গয়ানাথের হুকুম মতে হৈরা ভোর বিয়ানে উঠিঠা চৈতালি ফসল বুইয়া আইনব্যার জন্তে বরুগাদারের বাড়ী বাইব্যার লাইগ্লছিল—এমুন স্নেমে পথে মরা কান্দন শুইনা তার পাচ পরাণ ছ্যাং কইর্যা উঠল। বরুগাদারের বাড়ী আর তার যাওয়ন হৈল না, সে তাড়াতাড়ি গোশাই বাড়ীর দিগে ছুইটা গেল।

হৈরা যখন গোশাই বাড়ীর আঙ্গিনায় পাও দিছে তখন সে বাড়ীর মাঠাগেন আঙ্গিনায় বাইর-করা মরা ছাওয়ালের মুখে উপুর হইয়া পইর্যা মাথা কুইটা কাইন্দব্যার লাগ্ছিল। রাখিকা গোশাইর মাঝারে ছাওয়ালটার উপুরে পোশু রাইতের থিকা ওলা দ্যাব্তার নজর হওনের কথা সে আগেই শুনছিল কিন্তু কোন ছুতায়ই গয়ানাথের কামকাজ

এরায়্য একবার আইসা খোঁজটাও নিবার পারে নাই, তার ছুই চইখু বাইর্যা দরদরায়্যা জল পইরব্যার লাইগ্ল।

ছুপুরের ঠিক যখন ঠাটাপরা রৈদ, সেই স্নেমে হৈরা মরা পুড়ান সারা কইর্যা পরণের কাপড় গায়ে শুকায়া ফিরা আইচে। তার পরাণ তখন খিদায় জরু জরু, শরীর তেফায় থরু থরু কইরব্যার লাইগ্লছিল বরুগাদারের বাড়ীর থিকা ফিরণের দেরি দেইখা গয়ানাথ যে তার সব কাণ্ড কারখানা মনে মনেই ঠাওয়ার কইর্যা নিছে, বিন্জকুমে পরের কামে যাওয়নে সে যে চাকরের উপুরে রাইগা আশুন হইয়া বইসা রইছে, হৈরার তা বুইবব্যার বাকী আছিল না। সে তাই বাড়ীর সামনে দিয়া সরাসর না চুইকা কাঙ্ছি কোনা ঘুইর্যা একিকালে মাঠাগেনের হবিশ্বিষরের আঙ্গিনায় বাইর্যা খাওয়নের লাইগা হাজির হৈল। কিন্তু হৈরার নছিপের ফ্যারে গয়ানাথ তখন বাড়ীর মধ্যেই আছিল। হৈরার আওয়াজ শুননমাত্রই সে পায়ের খরম খুইলা এমনভাবে হৈরার উপুরে রুইখা খারাইল যে সে ফ্যাল ফ্যলাইয়া রাইমণির দিগে তাকাইতে তাকাইতে ভয়ের চোটে ছুই এক পাও কইর্যা না পাইছায়্যা থাকব্যার পাইরলো না। গয়ানাথের ব্যবহার রাইমণির কাছে আইজ ভারি অসহ ঠেইকল। সে রাগের মাথায়, তার বাড়ীর থিকা তারি চাকরেরে খেদায়্যা দেওয়ানের কোন একতারই যে গয়ানাথের নাই, এই ভাবের একটা কথা খুব রুইঠা স্নেরে কইর্যা ফেলাইল।

এত বড় একটা থোটা সওয়নের মতন ম্যাজাজ গয়ানাথের কুষ্টিতেই লেখা নাই। সে যে পরের খায়্যা মানুষ, এই কথা সে শাস্কাতে অশাস্কাতে পারাপোশিগোরে মুখে যখন তখনই শুইনত,

আর তার কোনই শোধ না তুলবার পাইয়া মনে মনে ইলাগাং আশ্রয়দাতারেই দোষী ঠাওরায়। আইস্‌ব্যার লাইগ্‌ছিল; তার উপরে আবার চাকরের মোকাবিলায় এই দারুণ অপমানের খোটা আইজ্‌ তারে রাগের মাথায় দুপুইরা চাড়াল করিয়া তুলিল। সে হাতের ধরম কেলার্যা চক্ষের পলকেই একটা পাইটুখেল কুড়ায়। আইনল, হৈরা যখন চিকুখইর দিয়া উঠছে তখন গয়ানাথের জোরে ফেইকা দেওয়া পাইটুখেলের গুতায় রাইমণির মাথা খণ্ড বিখণ্ড হইয়া গেছে, তার নিসর্ধিং শরীর রক্তে মাখাচোখা হৈয়া মাটিতে লুটাইবার লাইগ্‌ছে।

বেলা তলানের আগেই যার যার মতো কিছু কিঞ্চিং ট্যাকে গুইজা গায়ের যত মুকুবিব-মাতববর এই ব্যাপারটীতে পানে চুনে মিশানের মতন নিভাজে হজম করণের লাইগা এক জুই হৈল। সচু খুনের দিন বৈলা স্মৃতিচুরামণি মশয় সে দিন আর ঐ দলে যোগ দিলেন না কিন্তু পরের দিন তিনি মোকাবিলা গয়ানাথ যেমুন রাইমণির পাওনা টাকার খতখান ফাইরা ফ্যালাইল, অমনি তিনার মনে বাওয়নের জাইৎ রাখনের লাইগা ফটু কৈরা ধর্মভাব উৎলায় উঠল। তিনি পাচ জনের সাথে একমত ত হৈলেন-ই—তার উপরে বাওয়নের ছাওয়াল জেলে গেলে তার যে জাইৎ যায়, আর যে গায়ের বাওনের জাইৎ যায় সে গায়ের চেংড়া বুইড়া বেবাকেরেই যে পাপপক্ষে ঘিরা ধরে, ও তার ফলে যে হাজার বছর কণ্ডুক-নরক ভুগণ লাগে, এই সকল শাস্তর প্রমাণের কথা গায়ের দশ জনেরে নিজে থিকা ডাইকা আইনা শুনাব্যার লইগলেন।

অনেক দূরে থাইকাও যেমুন মরা জীবজন্তু শকুণের নজর এয়ায় না, লাভের তদন্তও সেই রকম গায়ের চোকিদারে চাপা দিলেও

খানার দারগাগোরে কাণে ঠিক মত পৌছে। গায়ের লোকের মাব্যস্ত থাকন সবেও রাইমণির মরণের চাইর দিনের দিন দারগা আইসা গায় অধিষ্ঠান হৈল। তখন মুখে কেউ কিছু না কৈলেও মুকুবিবগোরে বেবাকেরি পাচ পরাণ তলে তলে খগড় বগড় করিয়া উঠল। কিন্তু দারগাসায়াব যখন সরাসর আসামীর বাড়ীতে না চুইকা তিনু সরকারের বাড়ীতে আড্ডা নিলেন, তখন সকলের মনেই অল্পবিস্তর সায়স জইসল। গায়ের মধ্যে তিনু সরকার দারগা পুলিশের ওয়াকিব জানা লোক। আরো কয়েকবার এই গায় দারগা তদন্তে আইছিল তখন তিনুই মধ্যে পইরা সব গোলমাল অল্পে সল্পে মিটায়্যা দিছে। আগামীরে হৈরা আননের জশ্বে কনেফবল পাঠানের আগেই তিনু নিজেই বাইয়া গয়ানাথের সাথে করিয়া, আইনা দারগার স্মৃখে হাজির করিয়া দিল। দেওকের মধ্যেই বাওয়নের জাইৎ বাচানের লাইগা দারগাবাবুও গায়ের মুকুবিবগোরে সাথে এক মত হৈলেন, ও মেলামার টাকা তিনশ কনেফবলেরে গইনা নিবার করিয়া, গুরগুরির মলটা মুখে গুইজা দিলেন। এমনি করিয়া দারগা বাবুর চিং যখন ঠাণ্ডা হইয়া আইল তখন তিনি গায়ের পাচ জনের দিগে ফিরা বইসা, পারাপর্শিরা ইয়া নিয়া বাতে আর কোন সুর গোল না করে, তারির পরামিশ দিবার লাইগলেন; এমুন স্মে পূব পাড়ার মুকুবিব রূপলাল রাইমণির চাকর হৈরারে সাব্যস্ত করিয়া দিয়া বাওয়নের কথা জানায়া হজুরের সামনে হাত জোর করিয়া খারাইল।

খুনের মোকাবিলা শাস্তী মাত্র হৈরা। তার মুখ বুজানের জশ্বে বেবাকের আগে গায়ের মুকুবিবরা তারি একলার হাতেই পচিশ টাকা দিব্যার গেছিল, কিন্তু সে দুই হাতে মুখ চাইকা সেই যে উইঠা গেছে

তারপরে ইলাগাং কেউই আর তার লাগুর পায় নাই। ছোট কালের থিকাই সে আছিল রাইমণির চাকর। সগণ সন্ন্যাসকে কেউ ত তার নাইই, বৈরাগী ফকিরেরও নিজের একখান ডেরা কুইরা থাকে তার তাও নাই। রাইমণির মরণের পরদিন থিকা গায়ের বাওয়ান ভদ্র বেবাকেরেই যখন সে গয়ানাথের পক্ষ নিতে দেইখল সেই দিন থিকা সে আর কেউর বাড়ীতেই যায় নাই। আইজ কয়দিন ধইরা সে তার ছোট-কাইলা মিতা হরি মালির কাছে আশ্রয় নিছে। মাঠাগেনের শোকে তার কৈলজাটা যে ফাট ফাট করে তা সে তার মিতারেও বুঝায় উঠব্যার পারে নাই।

হৈরা আইসা দারগার কাছে খারাইতেই ইকয়দিনকার চাপা কান্দন তার মুখ চইখু ছাপায়। বাইরয়া পৈল। খানিক বাদে কান্দন থাইমা আইলে, সে যেমুন তার মাঠাগেনের খুনের নালিশ লজুরের কাছে মনের খেদ মিটায়া জানাইব ভাইবা একটু থির হইয়া রইল, ঠিক সেই স্তমে দারগা তারে ঠাণ্ডা হৈতে দেইখা সে যাতে আর এই খুনের বিষয় নিয়া কোন রকম স্তরগোল না করে, এই কথা ফিরা ফিরা দুই তিন বার তারে বুঝায়। কইলেন আর তিনি কথামতন না চইললে তার নিজেরও ফাস্তাদে পড়ন লাইগুব ইয়াই বৈলা একটু শাসায়াও রাইখলেন। দারগার ই-সকল কথায় হৈরা হাঁ ছুঁ কিছই না কইয়া ক্যাবল থম্ব ধইরা বইসা রইল। ইয়ারি মধ্যে দারগা সায়াব তিনু সরকারেরে কি য্যানু ইসারা কইরলেন আর সে উইঠা গয়ানাথের হাতে থিকা গোণা পনরটা টাকা নিয়া হৈরার মুঠের মধ্যে রাখতেই সে ছেচলা টান দিয়া হাত ছারায়। আইনল, ফলে তার হাতের উচ্চটে তিনুর হাতের বেবাক টাকা ঘরময় ছরায়। পইল, এবং

তারি একটা টাকা দারগার ডেনায় ছিটা পরলে, তিনি রাইগা অগ্নি-শর্মা হৈলেন। তিনি মুখের ভিরকুটা ও চইখের ভাব দেইখা আর কেউ কিছু ঠাওয়ার না পাইলেও তিনুর বুঝতে বাকী রইল না যে হৈরার শ্রীমন্দিরে যাওয়ান ঠেকানের লোক আর ই পিরুথিমিতে কেউই নাই।

সাত দিন পরে মহুকুমার মাজিফ্টরের এজলাসে হৈরার বিরুদ্ধে,— থানায় থুনের মিথ্যা এজাহার দেওয়ান আর দারগা রাসবিহারী দাসের উপরে খামাখা রুইখা যাওন, এই দুই অপরাধের দুই নম্বর মামলার বিচার এক সাথেই সারা পাইল। স্বয়ং দারগার জোবানবন্দী হওয়ানের পরেই তিনু সরকার সাক্ষীর কাঠগরায় খারাইল। তার জোবানবন্দীর স্তরতে রাইমণি সন্ন্যাস রোগে মইরা গেছে তক শুনতেই হৈরার মুখে চইখে কেমন য্যানু একটা চমক লাইগুতে দেখা গেল। বোধ করি, সাক্ষীর কথায় আসামীরে চইমকা উঠতে দেইখাই সে যে পূরা অপরাধী মাজিফ্টর তা মনে মনেই ঠাওয়ার পাইলেন। তার পরে মাত্র রূপলাল আর একজন কনেঠবলের সাক্ষী নিয়া, আরও যে অনেকে রাইমণির সন্ন্যাস রোগে মরণ আর দারগা সায়াবের উপরে হৈরার খামাখা রুইখা যাওয়ানের কথা ঠিক ঠিক কৈবার আইচিল, উবুরস্ত ও অতিরিক্ত বৈলা হাকিম তাগোরে বেবাকেরেই কাচারির বাইর থিকাই বিদায় দিলেন।

দণ্ডক কাল বইসা মাজিফ্টর রায় লেইখলেন পরে আসামীরে যখন দুই বছর ফাটকের কথা পইরা শুনান হৈল, তখন তার মুখের ভাবের কিছই বদল দেখা গেল না।

শ্রীকুরেশানন্দ ভট্টাচার্য।

বিজ্ঞাপতি।

—:~:—

পলিটিক্সের রঙ্গমঞ্চে পেট্রিয়টিজ্‌ম্ জিনিসটার যে-রকম মূল্যই থাকে না কেন বাণীর মন্দিরে কিন্তু তার কোন আসন নেই। যদি বা থাকে ত সেটা নিতাস্তই নীচু—আর একান্তই এক কোণে। এই পেট্রিয়টিজ্‌ম্‌কে সঙ্গে নিয়ে যদি আমরা বাণীর মন্দিরে প্রবেশ করি তবে বাণীপাণীকেই আমরা খাট করব—আর তাতে সবার চাইতে সবার আগে ক্ষতি হবে পেট্রিয়টিজ্‌মেরই। আমরা যে আঙ্গকাল সময়ে অসময়ে সভাসমিতিতে ঘরে বাইরে সুযোগ পেলেই আমাদের বৈষ্ণব কবিদের সম্বন্ধে একটা আকাশ-পাতাল জোড়া মত প্রকাশ করি—বিশ্ব-সাহিত্যের মাঝে তাদের প্রত্যেকের জন্মে এক-একখানি হীরক-মুক্তা-খচিত রত্নসিংহাসন পেতে দিয়ে প্রশংসমান নেত্রে গদগদভাবে বলি—আঃ কি সুন্দর—এমন আর হয় না—এমন আর হবে না—হতে পারে না—সে-সবের মাঝে আমাদের পেট্রিয়টিজ্‌ম্ জিনিসটা কতখানি আছে তা জানি নে—কিন্তু তার মধ্যে যে এই পেট্রিয়টিজ্‌ম্ জিনিসটার একটা বড় রকম এলোপ্যাথিক ডোজ থাকার সম্ভাবনা থাকতে পারে—সেই কথাটাই এখানে বলে নেওয়া আমার উদ্দেশ্য।

বর্তমান প্রবন্ধে এই বৈষ্ণব কবিদেরই একজন—বিজ্ঞাপতির সম্বন্ধে কিছু আলোচনা করবার ইচ্ছা করি। এই প্রবন্ধটা নিয়ে আমি

বিজ্ঞাপতিকে সার্টিফিকেট দিতে যাচ্ছি নে—সেটা ধুষ্টতা বলেই মনে করি। বিজ্ঞাপতি যে কবি—একজন প্রকৃত কবি সে সম্বন্ধে বোধ হয় দুঃমত নেই। বাস্তবিক—

শৈশব ঘোঁষন চুছ মিলি গেল।

শ্রবনক পথ চুছ লোচন নেল ॥

চৌঙকি চলয়ে ক্ষণে ক্ষণে চলু মন্দ।

মনমথ পাঠ পহিল অনুবন্ধ ॥

কবরা ভয়ে চামরী গিরি-কন্দরে

মুখ ভয়ে চাঁদ আকাশে।

হরিণী নয়ন ভয়ে স্বর ভয়ে কোলিল

গতি ভয়ে গজ বনবাসে ॥

সজনি ভাল করি পেখন না ভেল।

মেঘমালা সঞে তড়িত-লতা জন্ম

হৃদয়ে শেল দেই গেল ॥

আধ আঁচল খসি

আধ বদনে হাসি

আধ হি নয়ান তরঙ্গ।

আধ উরঙ্গ হেরি

আধ আঁচর ভরি

তদবধি দগধে অনঙ্গ ॥

নব বৃন্দাবন

নবীন তরুগণ

নব নব বিকশিত ফুল।

নবীন বসন্ত

নবীন মলয়ানিল

মাতল নব অলিকুল ॥

—এ রকম আরও কতও আছে—এ সবেদর মধ্যে যে সুর ও সৌন্দর্য রয়েছে তা বাঙ্গালী হ'য়ে যিনি উপভোগ করতে পারেন নি তাঁর দুর্ভাগ্যই বলতে হবে। আমার উদ্দেশ্য হচ্ছে বিভাগপতির পদাবলীর মূল কথা যেটা সেইটে নিয়ে একটু আলোচনা করা।

(২)

এমন অনেক সমালোচক আছেন যাঁরা বলেন যে বৈষ্ণব পদাবলী কুনীতি কুরচি ও অশ্লীলতা পূর্ণ। স্তত্রাং এ-শুলোর কোন মূল্য নেই—বড় জোর এ-সব নিকৃষ্ট শ্রেণীর কবিতা। তাঁরা বলেন যে এই সকল কবিতার সংসর্গে এসে নরনারীর মন চঞ্চল ও অশুচি হ'য়ে ওঠবার সম্ভাবনা—ভাতে সমাজের অমঙ্গল। আর্থাৎ এই সকল সমালোচক যখন কাব্য সমালোচনা করতে বলেন, তখন তাঁরা শুধুই কাব্য-সমালোচকই নন সেই সঙ্গে সঙ্গে তাঁরা নীতিবিদ ও বটেন আবার সমাজ-পতিও বটেন। আর আমাদের ত এটা চোখে দেখা যে Judicial Executive এক জনের হাতে থাকলে বিচারে ভুল হবার সম্ভাবনা পদে পদে। এই শ্রেণীর সমালোচকের বিচারটা কতকটা এই রকমের।

আসল কথা হচ্ছে এই পৃথিবীতে কেউই কবির dictator হতে পারে না—তা তিনি নীতিবিদই হন, সমাজপতিই হন, বা নবাব সিরাজদ্দৌলার নাতিই হন। কবির লেখায় যদি সমাজের অমঙ্গল হয় তবে সমাজপতি সে কবিকে কারণে রুদ্ধ করতে পারেন কিন্তু তাঁর দ্বারা নীতির তত্ত্ব লিখিয়ে নিতে পারেন না। কবি কি লিখবেন

তার উপরে সমাজপতি নীতিবিদের হাত ত নেইই খোদ কবিরও বড় বিশেষ নেই। কারণ কবিতার জন্ম যেখানটায় সেখানে কবির মনোময় পুরুষ পৌছিতে পারে না। কবির যেখানে এই কবিতার জন্ম হচ্ছে সেখানটা কুনীতি সুনীতি, শ্লীল অশ্লীল জুড়ে বসে নেই—সেখানটা জুড়ে বসে আছে সত্য ও আনন্দ। যখন সেই জগৎ থেকে আনন্দের ঠেলা খেয়ে সত্য, সুর ও সৌন্দর্যকে সঙ্গে নিয়ে কবির মনোরাজ্যে নেমে আসে, তখন কবি বসে যান তাতে শব্দ যোজনা করতে—আর তখনই আমরা পাই কবিতাকে। কবি তখন দেখে সত্যকে, পায় সৌন্দর্যকে, অনুভব করে আনন্দকে। শ্লীল অশ্লীল কুনীতি সুনীতি প্রভৃতি কথা ভাববার অবসরই নেই তখন তার। সে তখন এমন একটা জগতে, যে-জগতটা এই অজ্ঞান ও বন্ধ পৃথিবীর চাইতে মুক্ততর, সত্যতর, দীপ্ততর। আর এই পৃথিবী দিয়ে সেই সত্যময় আনন্দময় জগতটাকে শাসন করবার চেষ্টাটা আমাদের ডন কুইকসোটো ও স্ত্রাঞ্জে পাঞ্জারই কথা স্মরণ করিয়ে দিয়ে যায়। কাজেই নিরঙ্কুশা হি কবয়ঃ—সে-কালেও এ-কালেও ব্যাকরণেও আচরণেও।

অপর পক্ষে আবার আছেন কৃষ্ণভক্ত পরম বৈষ্ণবেরা। তাঁরা আমাদের দিকে চোখ রাঙিয়ে বলবেন—সাবধান লেখক—এ সব পদাবলী নিয়ে খেলা নয়। এ সব হচ্ছে রাধাকৃষ্ণের চিরন্তন লীলা—অমূল্য রত্ন—এ সবেদর উপরে কলম চালাতে যেও না—সাবধান। আমরা বলব রাধাকৃষ্ণের লীলা বটে কিন্তু লেখা মানুষের। কৃষ্ণভক্ত বলবেন—মানুষ, সে কি সাধারণ মানুষ! তাঁরা ছিলেন সব ভক্তশ্রেষ্ঠ পরম সাধক। আমরা উত্তরে বলব যে—পরম সাধক হলেই চরম

সাহিত্যিক হয় না—শ্রেষ্ঠ ভক্ত হলেই উৎকৃষ্ট কবি হয় না। আসল কথা হচ্ছে যে রাধাকৃষ্ণ বড় মহাজন বটে কিন্তু সেই বড় মহাজনের নামের ছাপ মেরে সাহিত্যের বাজারে আমরা কোন মালই বিনপনখে চালিয়ে নিয়ে যেতে দেব না। বড় লোকের হাতে আংটা থাকলে সাধারণ লোকে সেটাকে সোনার আংটা বলে' মনে করুক কিন্তু যে স্বর্ণকার তাকে দেখতে হবে পরীক্ষা করে', সে-আংটা বাস্তবিক সোনার না পিতলের।

গৌরাঙ্গভক্ত পরম বৈষ্ণবের পায়ের ধুলো নিয়ে আমরা জীবন কৃতার্থ মানতে পারি এবং তিনি যখন মৃদঙ্গ দেখে ভাবে আত্মহারা হয়ে অশ্রু বর্ষণ করেন তখনও কারও আপত্তি করার কারণ ঘটে না। কিন্তু বাণ্যন্ত্রের বিচারকালে যদি তিনি বলে' বসেন যে, সকল বাণ্য-যন্ত্রের সেরা বাণ্যযন্ত্র হচ্ছে মৃদঙ্গ তখন তাঁর সঙ্গে তর্ক লাগবেই—তখন আমাদের বলতেই হবে যে বাণ্যযন্ত্র হিসাবে বীণার স্থান মৃদঙ্গের চাইতে অনেক উঁচুতে—তা তিনি আমাদের গালাগালিই দিন, ভক্তিবান নরাদমই বলুন আর যাই করুন।

(৩)

এতক্ষণ এক রকম ভূমিকাত্তেই কেটে গেল। এইবার আসল কথা পাড়ব।

বলেছি যে বিছাপতির পদাবলীর আসল কথাটা নিয়ে একটু আলোচনা করব। এই আসল কথাটা কি? সেটি হচ্ছে প্রেম—মধুর প্রেম। প্রমাণ,—এতে পূর্বরাগ, অভিসার, বিরহ, মিলন ইত্যাদি

মধুর প্রেমের যা কিছু আনুমানিক সব আছে। এখন একটা প্রশ্ন করা যেতে পারে এই যে—প্রেম ত বোঝা গেল—কিন্তু কার প্রেম?

যাঁরা একটু আধ্যাত্মিক ছাঁচের লোক তাঁরা অত্যন্ত গম্ভীর হ'য়ে বলবেন যে এ-প্রেম পরমাত্মার সঙ্গে জীবাত্মার—যাঁরা একটু পৌরাণিক ছাঁচের তাঁরা নিতান্ত আশ্চর্য হয়ে ভাববেন—কার প্রেম? এ প্রশ্ন আবার ওঠে কেন! স্পষ্টই ত লেখা রয়েছে এ সব রাধাকৃষ্ণের প্রেম। এঁরা হ' দলই হয়ত ঠিক। কিন্তু আমরা হচ্ছি সাধারণ লোক—আমরা বলছি যে এ প্রেম জীবাত্মা পরমাত্মারও নয়, রাধাকৃষ্ণেরও নয়—এ প্রেম হচ্ছে বিছাপতির নিজের। বিছাপতির যে পদাবলী তার প্রত্যেক লাইনটার প্রত্যেক শব্দটার প্রত্যেক সুরটার পিছনে রয়েছে বিছাপতির অনুভব—বিছাপতির দৃষ্টি—বিছাপতির আনন্দ। এক কথায় বিছাপতির পদাবলীর পিছনে রয়েছে মানুষেরই হৃদয়ের স্পন্দন—মানুষের অনুভবেরই অনুবাদ। আর সেই জন্মেই এ সব পদাবলী রাধাকৃষ্ণের নাম করে' চিরকাল মানুষকে ফাঁকি দিয়ে যাওয়া শুরু। কারণ প্রেম জিনিসটা সম্বন্ধে সব মানুষেরই বেশী কম অভিজ্ঞতা আছে। কিন্তু সেটা ধীরে ধীরে আসছে।

এখন দ্বিতীয় প্রশ্ন উঠতে পারে যে বিছাপতির প্রেম হোক - কিন্তু কার প্রতি প্রেম সেটাও ভাবা উচিত। আমরা বলি যে তাঁর কোনই দরকার নেই। কারণ কাব্যে প্রেম কতখানি মহীয়ান গরীয়ান সত্য হ'য়ে উঠবে তা কবি কাকে ভালবেসেছেন তাঁর উপরে নির্ভর করে' না মোটেই। নির্ভর করে' এর উপরে যে কবি কেমন ভালবেসেছেন—আর তাঁর কতখানি আত্মপ্রকাশকের ক্ষমতা—তাঁর প্রতিভার ওজনই বা কত। রজকীগীকে ভালবেসেও চণ্ডীদাস প্রেমের মহীয়ান রূপের দর্শন পেলেন—আর

সেটা ঐ উপরে যা বলা গেল তারি সত্যতা প্রতিপন্ন করছে বলেই মনে করি। আসল কথা হচ্ছে এই যে মানুষের যে প্রেম তা ভগবানের প্রতিই হোক বা মানুষের প্রতিই হোক দুইই তাকে এক রকম অমৃতই মিলিয়ে দেবার ক্ষমতা রাখে। কারণ প্রেমের যে অমৃত মিলিয়ে দেবার ক্ষমতা সেটা ভগবানেও নেই—প্রেমপাত্র ও প্রেম-পাত্রীতেও নেই—সেটা আছে প্রেমের মধ্যে—প্রেমিক প্রেমিকার প্রেম অনুভব করবার শক্তির মধ্যে—তাদের প্রেমানুভূতির গভীরতা ও একনিষ্ঠতার মধ্যে। সুতরাং বিছাপতির প্রেম শ্রীকৃষ্ণের প্রতি না শিবসিংহের অন্তঃপুরবাসিনী কোন কিশোরীর প্রতি তা নিয়ে মাথা ঘামাবার আমাদের দরকার নেই। আমরা দেখতে চাই তাঁর কাব্যে আমরা কি পাই। আর সে জন্মে বৈষ্ণব কবিদের আলোচনা কালে এ কথাটা আমাদের মনে রাখা খুব দরকার যে আধ্যাত্মিক-যোগ সাধনা আর কাব্য-রচনা এক কথা ত নয়ই—এ দুয়ের এক প্রথাও নয়। কারণ কাব্য-রচনাটা এক প্রকারের সাধনা বলে মেনে নিলেও সব রকমের সাধনাই যে কোন প্রকারের কাব্য তা স্বীকার করতে পারে তারাই বাদের মস্তিষ্ক আর হৃদয়টা ঠিক অ্যানাটমির নিয়ম রক্ষা করে স্ফুট হয় নি।

বৈষ্ণব কবিদের কথা উঠলেই যে আমরা “আধ্যাত্মিক” “যোগ-সাধনা” ইত্যাদি ইত্যাদি কতগুলো বাঁধিগৎ আঁড়িয়ে তাঁদের কাব্যের চার পাশে একটী Mystery-র কুয়াশা সৃষ্টি করি সেই কুয়াশা কতকটা দূর করবার প্রয়াসেই উপরের অতগুলো কথা বলা গেল—নইলে কতগুলো বোধ হয় অবাস্তব। যা হোক এখন বিছাপতির পদাবলীর আসল কথাটার দিক থেকে একটা মূল্য দেখতে চেষ্টা করব। এই আসল কথাটা হচ্ছে মধুর প্রেম।

(৪)

বিছাপতির কাব্যের একটা মঠিক মূল্য নির্ধারণ করতে গেলে তাঁর একটা কবিতাকে বাদ দেওয়া দরকার। সেটা হচ্ছে সেই সর্ববৃহৎ সর্বজনোদ্ধৃত কবিতাটা—

সখি কি পুছসি অনুভব মোয়।

সেহ পীরিতি অনুরাগ বাখানিতে

তিলে তিলে নূতন হোয় ॥

জনম অবধি হাম রূপ নেহারিনু

নয়ন না তিরপিত ভেল।

সেহ মধুর বোল শ্রবনহি শুননু

শ্রুতি পথে পরশ না গেল ॥

কত মধু বামিনী রভসে গোঁয়ায়িনু

না বুঝনু কৈছল কেলি।

লাখ লাখ যুগ হিয়ে হিয়ে রাখনু

তবু হিয়া জুড়ল না গেলি ॥ ইত্যাদি ॥

এ-কবিতাটা বাদ দেওয়া দরকার এই জন্মে যে এটা দিয়ে বিচার করতে গেলে বিছাপতির কাব্য সম্বন্ধে একটা ভুল ধারণাই হবার সম্ভাবনা। কারণ এ কবিতাটা বিছাপতির অস্বাভাব্য পদাবলী থেকে এত বিভিন্ন—এত উঁচুতে যে হঠাৎ মনে হয় এটা বৃষ্টি প্রক্ষিপ্ত। এই কবিতাটা দাঁড়িয়ে উন্নতশিরের বিছাপতির বিরুদ্ধে সাক্ষী দিচ্ছে। বলছে—দেখ দেখ—আমি কি হতে পারতাম—অথচ কি হই নি—আর সে দোষ বিছাপতি ঠাকুরের। আমার মনে হয় এই কবিতাটাকে

চণ্ডীদাসের ভাব বিছাপতির ভাবের পোষাকে একেবারে নিখুঁত সুন্দর হ'য়ে ফুটে উঠেছে।

এ কবিতাটা পড়ে আমাদের অন্তরে যে ছবি ফুটে ওঠে সে এ-লোকের নয়—সেটা স্বলোকের। মানুষের অন্তরে যে একটা প্রেমের এমনি পারাবার আছে যার তল সে নিজেই বুঝে উঠতে পারে নি তার পরিচয় এ কবিতার প্রত্যেক ছন্দে আছে। এই গ্রামটায় আমরা প্রেমের যে সুর শুনতে পাই সে-সুর বোধ হয় কতকটা পরিমাণে আর একটা কবিতায়ও আছে—সেটা হচ্ছে সেই যার আরম্ভ “আজু রজনী হাম ভাগো পোহায়নু পেখনু পিয়া-মুখ-চন্দ” দিয়ে। কিন্তু এ ছাড়া বিছাপতির আর যে-সব পদাবলী তার জন্ম প্রেমলোকে হয় নি—তার জন্ম হয়েছে কামলোকে।

কথাটা শুনতে বোধ হয় একটু কড়া শোনায়—কিন্তু উপায় কি? যখন পড়ি—

কি লাগি বদন কাঁপসি সুন্দরী

হরল চেতন মোর।

পুরুষ বধের ভয় না করহ

এ বড়ি সাহস ভোর ॥ ইত্যাদি

তখন এ-সব পদের ভিতর দিয়ে বিছাপতি ঠাকুরের হৃদয়-প্রেমের কোন ধারা আমাদের অন্তরকে স্পর্শ করে' যায় না—আমাদের মনে অঙ্গ রকমের ছবি ফুটে ওঠে। হাফেজের একটা কবিতা আছে—

ছড়ায় রাজার পথে তার।

মণি মুক্ত কতই না জানি ;

আমি কিন্তু মোর প্রিয়া লাগি

আঁখিতে বাঁধাব পথ খানি।

তবুও এ অনুবাদ—কিন্তু এর পিছনে হাফেজের যে একটা অনুভবের অনুভব আমরা পাই বিছাপতির কাব্যে তা কোথাও পাই নে—অবশ্য বলেছি এ একটা কবিতা ছাড়া যেখানে বলা হয়েছে যে সে-প্রেমের ব্যাখ্যান করতে “তিলে তিলে নূতন হোয়”। কেউ কেউ মনে করতে পারেন যে আমি আমার মত সমর্থন করবার জগ্গে খুঁজে খুঁজে বহু কক্ষে ঐ একটা পদ বের করে' এখানে লাগিয়ে দিয়েছি। কিন্তু যাদের বিছাপতির কাব্যের সঙ্গে পরিচয় আছে তাঁরাই জানেন যে তাঁর পদাবলীতে আণা থেকে গোড়া পর্যন্ত হৃদয়ের কথার চাইতে হৃদয়জের রাখাই বেশী। আর হৃদয়জ জিনিসটা প্রেমলোকের গানের বিষয় নয়—সেটা হচ্ছে কামলোকের ধ্যানের বস্তু।

দেশী বিদেশী অনেক প্রেমিক-কবির কবিতা তুলে তার সঙ্গে তুলনা করে' বিছাপতির প্রেমের গানের যে কি পার্থক্য তা দেখান যেতে পারে কিন্তু তাতে পুঁথিই বেড়ে যাবে আর তার দরকারও নেই। কেননা বিছাপতির কাব্য নিজ গুণেই স্বপ্রকাশ হ'য়ে আছে—তা বুঝবার জগ্গে আর কারও কাছে যাবার দরকার নেই। বিশেষতঃ প্রেম জিনিসটা এমন একটা দ্রব্য যার গুণ সন্ধ্যাে সব মানুষেরই অঙ্গ বিস্তর অভিজ্ঞতা আছে। সেই অভিজ্ঞতাটা একবার খতিয়ে দেখবার চেষ্টা করা যাক।

একাল পর্যন্ত মানুষ প্রেমের তিমটা রূপের দর্শন লাভ করে' এসেছে। প্রথমটা হচ্ছে—নিছক কাম। এতে নাসিকা কৃষ্ণিত

করবার কিছু নেই। কারণ এও একটা ভগবান-সৃষ্ট সত্য। এর প্রতিষ্ঠা হচ্ছে মানুষের ইন্দ্রিয়ের উপরে—তার দেহের অণু-পরমাণুর যে চৈতন্য তার উপরে—তার অমময় কোষের instinct-এর উপরে। এও এক প্রকারের প্রেম। এ প্রেমের আনন্দ অতি পরিমিত, অতি সীমাবদ্ধ—কেননা অম্মের সীমা আছে আর সেইজন্যই এটাকে আমরা নিকৃষ্ট প্রেম বলি—কারণ মানুষকে এর আনন্দ দেবার ক্ষমতা অতি কম। এই প্রকারের প্রেমেই জমেছে ভারতচন্দ্রের বিছাছন্দর, বায়রণের ডন জুয়ান, বোকাচয়্যের ডিক্যামেরন। দ্বিতীয় প্রকার হচ্ছে কাম এবং প্রেমের একটা কেমিকেল কম্পাউণ্ড গোছের। এইটী হচ্ছে বিশেষ করে মানবীয় প্রেম। সাধারণতঃ মানুষের অন্তরে কাম ও প্রেম এমনি ভাবে জড়াজড়ি করে থাকে যে এর একটাকে বাদ দিয়ে আর একটাকে প্রায় সে বুঝতেই পারে না। মানুষের অন্তরে এই প্রকার প্রেমের মধ্যে কামের ভোজ যত কমে আদ্যুতে থাকে আর প্রেমের ভাগ যত বেড়ে যেতে থাকে তার আনন্দের অনুভবও তত পরিপূর্ণতর হতে থাকে। কেননা কামই মানুষের সীমা দেয়—কামই মানুষকে সকাম করে তোলে—আর মানুষ সকাম যেখানে সেখানে তার দুঃখের চাইতে স্বখ কম—অমৃতের চাইতে অশাস্তি বেশী। এ প্রেমের প্রতিষ্ঠা হচ্ছে মানুষের হৃদয়ে। তাই এ প্রেমের আনন্দেরও সীমা আছে। কারণ মানুষের হৃদয় ক্ষুদ্র না হলেও তা অসীম নয়।

এ দুই প্রকার ছাড়া তৃতীয় রকমের এক প্রেম আছে যেটা মানুষ সাধারণ ভাবে অনুভব না করলেও অসাধারণ ভাবে মাঝে মাঝে তার খবর সে পেয়েছে। সেটা হচ্ছে নিছক বিশুদ্ধ প্রেম। এই প্রেমের অনুভবেই অমৃত—এ প্রেমের আনন্দের পূর্ণতা বাইরের মিলনকে

উপেক্ষাও করে না—আবার তার অপেক্ষাও রাখে না—এ প্রেম স্বরাট, যা নিজগুণেই মানুষকে অমৃত পাইয়ে দেয়। এ প্রেমের মানুষকে অমৃত পাইয়ে দেবার ক্ষমতা অসীম—কারণ এ প্রেমের প্রতিষ্ঠা সেইখানে যেখানে মানুষের সীমা নেই। কেউ কেউ হয়ত বলবেন যে আমি বাজে বঝছি—বড় জোর একটা থিওরির সৃষ্টি করছি। এর ছাপাই স্বরূপ বলছি যে এই প্রকার প্রেমের ইঙ্গিতই চণ্ডিদাসের পদাবলীতে অনেক খানে আছে—অবশ্য তাও অনেক স্থলেই তত্ত্ব হিসেবে—কাব্য হিসেবে নয়। কারণ একথা আজকাল সবাই মানেন যে তত্ত্বকথা পড়ে গাঁথলেই তা কাব্য হয়ে উঠতে বাধ্য নয়।

এই যে তৃতীয় রকমের প্রেম এইটে হচ্ছে উত্তম প্রেম। কারণ এ প্রেমের অনুভব যখন মানুষ পায় তখন তার পূর্ণ আনন্দ—তখন তার প্রেমে দুঃখের লেশমাত্র থাকে না। কারণ এ প্রেমে ব্যর্থতার স্থান নেই—কেননা এ প্রেমের অনুভবের মধ্যেই মিলন রয়েছে—আর তার কারণ হচ্ছে এই যে দৈহিক মিলনটা যতটা স্পষ্ট ততটা সত্য নয়। আর প্রেমের সত্য ধর্মই হচ্ছে মানুষকে আনন্দ দেওয়া—দুঃখ দেওয়া নয়। এ প্রেম উত্তম প্রেম কারণ এ প্রেমের আনন্দ দেবার ক্ষমতাও অসীম—কেননা বলেছি এর প্রতিষ্ঠা অম্মে নয়—অম্মের সীমা আছে—মানুষের হৃদয়েও নয়—হৃদয়ও অসীম নয়—এ প্রেমের প্রতিষ্ঠা তার চাইতেও উর্দ্ধলোকে। এ প্রেম সীমাকে আশ্রয় করে অসীমে উন্মুক্ত হয়েছে—এ প্রেম রূপকে জড়িয়ে অরূপে বিকশিত হয়ে উঠেছে—তাই এ প্রেমে অম্ম পরিত্যক্তও হয় নি আবার তার আধিপত্যও রয় নি—ইন্দ্রিয়াদি মুছেও যায় নি আবার তার বন্ধনও

পড়ে নি—এই হচ্ছে সীমার মধ্যে অসীমের খেলা—রূপের মাঝে অরূপের প্রকাশ। আর এই হচ্ছে মানুষের আসল সত্যময় রহস্যটা যা দিয়ে সে তৈরি।

এখন আমরা প্রেমের কবিতার মধ্যে চাই এমন কতগুলো কথার সমষ্টি—এমন একটা সুরের ব্যঞ্জনা—এমন একটা ভাবের সঙ্গীত যার ভিতর দিয়ে আমরা খবর পাব এই উত্তম প্রেমের। কারণ ঐ দিকেই আমাদের গতি—ঐটেই যে আমাদের সত্য আর ঐটেই যে আমাদের অপ্রাপ্ত। যেটার সঙ্গে আমাদের সাফাৎ সম্বন্ধে পরিচয় নেই—সেটার খবর আমরা পেতে চাই কবির অন্তরের ভিতর দিয়ে। কারণ কবি অস্বাভাবিক লোক থেকে কিছু অসাধারণ। আমরা সাধারণ মানুষ যে লোকে যেতে পারিনে কবি সেখানে হামেশাই যাওয়া আসা কচ্ছেন। সুতরাং প্রেমের উৎকৃষ্ট গান বলব সেই সবকে যা আমাদের এই উত্তম প্রেমের অনুভব কতকটা করিয়ে দিতে পারে। আর যে গান যত বেশী করে—যত গভীর করে—যত স্পর্শ করে ঐ ভাব আমাদের অনুভব কারণে দিতে পারবে সে-গানকে আমরা তত উচ্চে আসন দেব। আর বিজ্ঞাপতির কাব্যে—বলেছি ঐ একটি কবিতায় ছাড়া—ঐ জিনিসটা আমরা পাই নে—অবশ্য সেটা জোর করে বলছি নে—সেটা বলছি দুঃখ করে।

বিজ্ঞাপতির হ'য়ে কেউ কেউ একটা কথা বলতে পারেন যে যেখানে মধুর প্রেমের ভিতর দিয়ে আত্মায় আত্মায় মিলন হয়েছে সেখানে ত দেহের মিলন ঘটবেই—সেখানে ত পরস্পরের চোখে পরস্পরের দেহ স্পন্দর হয়ে উঠবেই—সেই রহস্যই ত বিজ্ঞাপতির কাব্যে আমরা পাই। সত্যি কথা—আত্মার মিলন হ'লে দেহের মিলন হবেই। কিন্তু যখন

কাব্যে দেহের মিলনটাই প্রধান বক্তব্য বিষয় হ'য়ে ওঠে এবং আত্মার মিলনের সন্ধানও পাওয়া যায় না—তখনই মুকিলের কথা। কারণ প্রেমিক লেখক যেখানে আত্মার মিলনের ভিতর দিয়ে দেহের মিলনে এসে পৌঁছেছেন পাঠক সেখানে দেহের মিলনের গান শুনে আত্মার মিলনে পৌঁছিতে পারে না। কেননা দেহ আত্মাকে গড়ে নি—আত্মাই দেহের জন্ম দিয়েছে। সুতরাং আত্মার সঙ্গে সঙ্গে দেহ এলেও—দেহের সঙ্গে সঙ্গে আত্মাকে পাওয়া যায় না।

ভারতচন্দ্রের বিজ্ঞানসুন্দর পড়ে' যে বিজ্ঞা বা স্পন্দরের অন্তরের প্রেমের কোন রূপ আমাদের মানস-চোখে ফুটে ওঠে না—সেটা সবাই একবাক্যে স্বীকার করবেন—কিন্তু বিজ্ঞাপতির পদাবলীর সম্বন্ধে যে মতভেদ হয় তাঁর কারণ আমার মনে হয়—রাধাকৃষ্ণ নামের পুরাতন মাহাত্ম্য আর আমাদের মনের সনাতন জড়ত্ব। রাধাকৃষ্ণ নামের সঙ্গে এমন কতগুলো association of ideas আমাদের মনে আছে যে রাধাকৃষ্ণের নাম পেলেই সেটাকে আমরা সেই সব "ideas"-এর আত্মসীকীচের ভিতর দিয়ে দেখি—নইলে দশ জনের চোখে খেলা হ'য়ে যাওয়ার আশঙ্কাও যে একটু না আছে তাও নয়। রামায়ণ পাঠ হচ্ছে। বিশল্যকরণি না চিন্তে পেরে মহাবীর হনুমান সমস্ত গন্ধমাদনটাকেই নিয়ে যাবার মতলব আটছেন। এক নিরক্ষর যুবতী কঁদেই আকুল। তার পার্শ্ববর্তী সঙ্গিনী জিজ্ঞেস করল—“ওলো কাঁদিসু কেন?” যুবতী বললে—“আহা কি কষ্ট।” সঙ্গিনী আশ্চর্য হ'য়ে জিজ্ঞেস করলে—“কার কষ্ট?” যুবতী উত্তর দিলে—“কেন! সীতার।” সঙ্গিনী বললে—দূর, এ যে হনুমানের কথা হচ্ছে। “যুবতী তখন চোখ মুছে বললে—“ওমা আমি মনে

করেছিলুম বুঝি সীতার বনবাস হচ্ছে।” এও যেন কতকটা সেই রকম।

যা হোক শেষে বক্তব্য হচ্ছে এই যে বিজ্ঞাপতির কাব্যকে যখন প্রেমের দিক থেকে দেখি তখন তাঁর সমস্ত পদাবলীগুলো পাঠ শেষ হয়ে গেলে দীর্ঘ-নিখাসের সঙ্গে সঙ্গে একটা কথাই খালি মনে জাগতে থাকে—সে কথাটা হচ্ছে—“পিতল কাটারি কামে নাহি আওল উপরহি ঝিকি-মিকি সার।” তবু যে বিজ্ঞাপতিকে একজন প্রকৃত কবি বলি তার কারণ হচ্ছে যে তিনি যে গান গেয়েছেন তা হৃন্দর ও মিষ্টি। আর অস্কার ওয়াইলডের এই যে কথা—

There is no such thing as a moral or immoral book ; books are well written or badly written that's all.

এ কথাটা নিতান্ত বাজে কথা নয় বলেই মনে করি।

(৫)

এখন যারা

তিন বাণে মদন জিতল তিন ভুবন
অবধি রহল দউ বাণে
বিহি বড় দারুণ বধিতে রসিক জন
সোঁপল তোহার নয়ানে ॥

কিন্মা

কামিনী করই সিনান।
হেরইতে হৃদয়ে হানল পাঁচ বাণ ॥

কিন্মা

বাঁপবি কুচ দরশয়েবি কন্দ।
দৃঢ় করি বাঁধিবি নীবিহক বন্দ ॥

ইত্যাদি পদে একটা ভীষণ আধ্যাত্মিক অর্থের ও তত্ত্বের সন্ধান পান তাঁদের কেউ কেউ আমাকে সম্বোধন করে' যে একটা কথা বলবেন তা জানি। তাঁরা বলবেন—হে মুর্থ লেখক! তুমি বিজ্ঞাপতির কিছুই বোঝ নি। তাঁর কাব্যে যে একটা আধ্যাত্মিক জীবনের পূর্ণ রহস্য—যে একটা গভীর যোগসাধনের ধারা ইত্যাদি ইত্যাদি। তা তাঁরা যদি বিজ্ঞাপতির কাব্যকে যোগশাস্ত্র বলে চালাতে চান তা চালান—তাতে আমার কোন আপত্তি নেই। তবে তাতে সাহিত্যের আসরে বিজ্ঞাপতির গৌরব কন্বে বই বাড়বে না—অন্ততঃ আমার ত তাই বিখাস।

শ্রীহরেশ চন্দ্র চক্রবর্তী।

বাজে তর্ক।

—:~:—

[স্থান—হারিসন রোডস্থ এক ত্রিতল বাটার একটি ক্ষুদ্র প্রকোষ্ঠ। সময়—সন্ধ্যা প্রায় সাড়ে ছটা। শচীন্দ্রকুমার ও তাহার বন্ধু অমিয় চৌকিতে উপবিষ্ট। উভয়েই তরুণ বয়স্ক যুবক। শচীনের চেহারাতে নির্ভীকতা, তেজস্বিতা ও সরলতার বেশ একটু আভা আছে। অমিয় একটু স্থূলকায় এবং তাহার চেহারা সাদাসিদে ভাল মানুষটির মত। দুই বন্ধুতে কথাবার্তা চলিতেছে।]

অমিয়। তোমার কাছে ফণীবাবুর সেই বইখানা আছে না, শচীন ?

শচীন। হ্যাঁ আছে। পড়া হয়ে গেছে, চাই তোমার ?

অমিয়। সেটা নিতেই তো এসেছি। আচ্ছা শচীন, সেদিন ফণীবাবুর সঙ্গে হরিদার কি তর্কই বেধে গেল। হাতাহাতি হয় আর কি! আমি না খামিয়ে দিলে ঠিক মারামারি হতো।

শচীন। হ্যাঁ, ফণীবাবুর অতটা তেতে ওঠা উচিত হয় নি। জানেই তো হরিদা একটুতে কি রকম চটে যায়, তার সঙ্গে এত তর্ক করা কেন? আর বিশেষ হরিদা বয়সে চের বড়, তাকে এতটা ক্ষেপিয়ে তুলে লাভ কি ?

অমিয়। তুমি আর কথা বল না। একবার তর্ক উঠলেই হ'ল, তার স্রোতে গা ভাসিয়ে কোথায় যে চলে যাও, তার ঠিকানাই পাওয়া যায় না।

[হরিদার প্রবেশ, তিনি অপর দুজনের অপেক্ষা বয়সে কিছু বড়। তাঁহার চুল সামনে ও পিছনে সমান ভাবে কাটা। শিরোপরি একটা শিখাও উঁকিঝুঁকি মারিতেছে।]

শচীন। এই যে হরিদা—আসুন।

অমিয়। অনেক দিন বাঁচবনে হরিদা। এইমাত্র আপনার কথাই হচ্ছিল।

হরিদা। তাই নাকি, আমার ভাগ্যি বলতে হবে। তা কি কথা হচ্ছিল শুনতে পারি কি ?

শচীন। এমন কিছু না। আপনার সঙ্গে ফণীবাবুর সেই বগড়ার কথা বলছিলাম।

হরিদা। বগড়া আর কি ? তবে যারা তর্ক করব বলে তর্ক করে, আর তর্ক করতে গিয়ে মেজাজ ঠিক রাখতে পারে না—তাদের সঙ্গে কথা বলে লাভ নেই। ফণী তো কথা বলতেই জানে না।

অমিয়। (একটু হাসিয়া) সে দোষটা শুধু ফণীবাবুর কেন, অনেকেরই আছে।

হরিদা। ফণী বলে কি জান ? আমাদের দেশের নাকি যা-কিছু সব মন্দ। আমাদের ধর্ম অচল, আমাদের সমাজের গঠন খারাপ, আমাদের স্ত্রীশিক্ষা নেই—এ সব অণ্ডায় কথা শুনলে কার না রাগ হয়, বল তো, অমিয়।

অমিয়। সে ত ঠিক কথা।

শচীন। না, ফণীবাবু এমন অণ্ডায়ই বা কি বলেছেন ? আপনারা সব বলেন যে আমাদের দেশে খুব স্ত্রী-শিক্ষা আছে, কিন্তু কোথায় যে আছে তাতে দেখতে পাইনে।

হরিদা। নেই? স্ত্রী-শিক্ষা নেই? আমাদের দেশে যে রূপ স্ত্রী-শিক্ষা, সে রূপ কোন দেশে তুমি দেখাতে পার?

শচীন। এইটে ঠিক কথা বলেছেন। আমাদের দেশে যেমন, এ রকম আর কোথাও খুঁজে পাওয়া যাবে না। আমাদের দেশে গৃহলক্ষ্মীদের সঙ্গে সরস্বতীদেবীর যেমন মুখ দেখাদেখি নেই—তেমন বোধ হয় এক আফগানিস্তান ছাড়া আর কোথাও নেই।

হরিদা। তুমি নিতান্ত অর্বচাচীনের মত কথা বলছ, শচীন। শিক্ষা তুমি কাকে বল? যাতে মনের স্ফূর্তিগুলির বিকাশ হয় এবং চরিত্র গঠন হয়, তাই তো শিক্ষা। এদিক থেকে বিচার করলে দেখতে পাবে, আমাদের দেশের স্ত্রীলোক যত শিক্ষিতা এরূপ আর কোথাও নেই।

শচীন। কেবল মুখে বড় বললেই তো হয় না, কিসে বড় সেইটা আমাকে বুঝিয়ে দিন।

হরিদা। কিসে বড়? স্ত্রীলোকের যাহা প্রকৃষ্ট গৌরবের বিষয়—‘মাতৃহৃৎ’ তাতেই বড়। জান, কবি যা বলে গেছেন তার এক বর্ণণা মিথ্যে নয়—“ভায়ের মায়ের এত স্নেহ, কোথায় গেলে পাবে কেহ”—কোথাও না।

শচীন। সর্বত্র গেলেই পাওয়া যাবে। “মা” হওয়াটা ভারত-বর্ষের স্ত্রীলোকদের একচেটে নয়। আর এই যে আপনি বলছেন ‘মাতৃহৃৎ’ আমাদের স্ত্রীলোকদের গৌরব, তা, ভাল-মা হবার উপ-যোগিতাই কি এদের আছে? শুধু বুকভরা স্নেহ থাকলেই ভাল-মা হয় না। পৃথিবীর ছোট-বড় নানা বিষয়ের ভাল-মন্দ বিচারের শক্তি, যে মাতৃহৃৎের ভিতর নেই সে মাতৃহৃৎকে আমি বড় বলতে পারিনি।

হরিদা। তোমার কাছে এক অভিনব কথা শোনা গেল। স্নেহ থাকলে ‘মা’ হয় না, মাতৃহৃৎ উচ্চদের জিনিস নয়, বাৎসল্যটা মায়া-মাত্র, অদ্ভুত বটে।

অমিয়। চটেন কেন, হরিদা? শচীনের কথায় দোষটা কি হল? সত্যিই তো, মনে করুন, যদি সন্তানের জ্বর হয়, সে ভাল জিনিস কিছু খেতে পায় না বলে, মা যদি একটি সম্বেদ্য লুকিয়ে খেতে দেন, তাহলে তার জ্বর-বিকার হতে পারে। শুধু স্নেহটা থাকলেই চলে না, আরও কিছু দরকার। আর ছোট ছেলের শিক্ষার ভার যদি রোজগারের খাটুনিতে শ্রাস্ত্রান্ত পিতারি নিতে হয়, তবে মাতৃহৃৎের গর্বটা অত করি কিসের?

হরিদা। শুধু স্নেহ থাকলেই সব হয়। ‘মা’ কখনও রুগ্ন সন্তানকে রূপা দিতে পারেন না। তোমরা যে শিক্ষা শিক্ষা কর, শিক্ষা কাকে বলে, তাই তোমরা জান না। মানচিত্র খুঁজে কোথায় পোপোকোন্টি-পেট্রল আছে তাই বের করার নাম শিক্ষা নয়; আর আকবর সাহের কটা হাতী ছিল—তা ঠিক না জানাটাই অশিক্ষা নয়।

শচীন। নিশ্চয়ই অশিক্ষা। পৃথিবীটা কি রকম, কোথায় কোন দেশে কি রকম লোক থাকে—এ সমস্ত না জেনে থাকা, আর ইচ্ছে করে অন্ধ হয়ে থাকা—একই কথা।

হরিদা। ওঃ, তোমরাই ভারি সব জান কিনা? তোমরা পৃথিবীর কটা খবর রাখ? কটা রাসায়নিক তথ্য তোমার জানা? ছুপাতা ইংরেজী পড়েই মনে ভাব তুমি ভারী শিক্ষিত; ধরতে গেলে, তোমাতে আর ঐ কেফাতে আমি কোন প্রভেদই দেখি না। ভ্রাতৃত্বের মধ্যে কেফা ভৃত্য আর তুমি বিয়ে পাস।

অমিয়। আপনি কি বলতে চান যে বিশ্ববিদ্যালয়ের শিক্ষা আমাদের কোন উপকারে আসে না ?

হরিদা। আসে বৈকি ? এতে খুব অর্থ আসে। তা নিজে ঘরকন্মা দেখে স্ত্রীকে অর্থসংগ্রহের চেষ্টায় পাঠাতে চাও তাকে খুব ঠেসে শিক্ষা দাও। কোন আপত্তি নেই।

শচীন। বাজে কথা বলেন কেন ? এই যে সব ছেলেরা মিল্টন, সেক্সপীয়র প্রভৃতি বড় বড় কবিদের বই পড়ে, এতে করে কি তাদের মনের বিকাশ হয় না, বলতে চান ? শত শত বৎসর ধরে ইউরোপ যে সভ্যতা মনপ্রাণ দিয়ে গড়ে তুলেছে, তার পরিচয় পেয়ে আমাদের কোন লাভ হয় না ?

হরিদা। কাব্য-রসাস্বাদনের জন্ম বহুদিন কষ্ট করে একটি বিজাতীয় ভাষা শেখবার কোন প্রয়োজন আছে বলে আমি বিবেচনা করিনে। তোমাদের ভবভূতি নেই, কালিদাস নেই, কৃত্তিবাস নেই, কাশীদাস নেই ? তোমরা নিজের সোনার অলঙ্কার ছেড়ে পরের গিগ্‌টিকরা জিনিস পরতে এত লালায়িত হও কেন ? শত শত বৎসর ধরে ইউরোপ কি Civilization-এর চর্চা করেছে ? তা কি তোমাদের হতাদর আর্ধ্যাধিদের Civilization-এর পায়ের কাছে লাগে ? আমাদের সভ্যতা, আধ্যাত্মিক বৈজ্ঞানিক নয়।

শচীন। আচ্ছা মানলুম, তাহলে আমাদের দেশে যে বিজ্ঞানের বিশেষ চর্চা হয় নি, তা ত স্বীকার করেন ? না তাও করেন না ?

হরিদা। না, তাও করিনে। যে দেশে স্থায়-দর্শনের এত গভীর গবেষণা হয়েছে সেখানে যে বিজ্ঞানের চর্চা হয় নি, এটা অসম্ভব কথা।

তা ছাড়া চর্চা নেই তোমাকে বললে কে ? অঙ্কশাস্ত্র, রাসায়নিক শাস্ত্র এ সব তো আমাদেরি জিনিস।

শচীন। বটে ? আর এই যে রেলগাড়ী চড়ে যাতায়াত কচ্ছেন, ট্রামে চাপছেন, বৈদ্যুতিক আলো ও বাতাস ভোগ কচ্ছেন, এ সবও কি আপনারদের মহর্ষিরা দিয়ে গেছেন নাকি ?

হরিদা। দেখ শচীন, তুমি আমাকে যা বলবে বল, কিন্তু আর্ধ্যাধিদের সম্বন্ধে কোন শ্লেষ প্রয়োগ ক'র না। তাঁরা তোমার ঠাট্টার পাত্র নন।

শচীন। রেখে দিন আপনার আর্ধ্যাধিদের। তাঁরা করেছেন কি ? লোকালয় ছেড়ে এক পাছাড়ে গিয়ে বনে ধ্যান করেছেন ; তাতে লোকের কি এল গেল ? আর কাজের মধ্যে করেছেন এই যে বামুন, বৈষ্ণ, কায়ত, শূদ্র প্রভৃতি সমাজের নানা ভাগ তৈরি করে, মানুষের সঙ্গে মানুষের যাতে চিরকাল একটা প্রভেদ থাকে, তার একটা পাকা বন্দোবস্ত।

হরিদা। পাশ্চাত্য শিক্ষার যে কি বিষয় ফল হয়, তা তোমাদের দেখেই বেশ বোকা যায়। বর্ণভেদ নিয়ে যে এতটা চেষ্টামিচি কর, বলি বর্ণভেদ নেই কোথায় ? ইউরোপে নেই ? তাদের মধ্যে বামুন যাদের পয়সা আছে, আর যে হতভাগ্য গরীব সেই শূদ্র, তাকে ছুঁলে তাদেরও জাত যায়। এ খবর রাখ ?

শচীন। সে বর্ণভেদ পৃথিবীর সর্বত্র আছে, ভারতবর্ষও বাদ যায় না। আমাদের মধ্যে যার অর্থ বেশী তাকে সম্মান করিনে ? চিরকালই করে এসেছি—কলির ভাগ্যে আজই যে করি তা নয় বরং ধনীর মান্য আজকাল কমে আসছে। আমাদের মধ্যে আছে দোকর

জাতিভেদ—এক পয়সার, আর এক জাতের। পয়সার উপদ্রব মানুষমাত্রকেই ভোগ কর্তে হবে, তাই করি, কিন্তু তার উপরে যে আর একটা হাতেগড়া দৌরাঙ্ক্য সহ্য করব, তা অসম্ভব।

অমিয়। যাক, তোমরা কি বাজে কথা নিয়ে তর্ক কচ্ছ, সন্ধ্যা-বেলা। তর্কে তোমাদের মধ্যে যে জিতবে, তারি মতে সায় দিয়ে পৃথিবীটা চলবে এই ভেবে তর্ক বাধিয়েছ—না কি? আচ্ছা হরিদা, আপনি তো বামুন, আপনি কি মনে করেন যে আপনার খাবার সময়ে আমি ছুঁয়ে দিলে, আপনি আর বামুন থাকবেন না—একদম কায়েত হয়ে যাবেন?

হরিদা। এম্মি ছোঁও কিছু বলব না, কিন্তু সামাজিক ভাবে যখন আহার করব, তখন ছুলে আমাকে শাস্ত্রানুসারে প্রায়শ্চিত্ত করতেই হবে।

শচীন। এই তো, এই জন্তেই তো আপনাদের সঙ্গে আমার লাগে। মিথ্যার উপর যে সমাজের ভিত্তি তা নিশ্চয়ই ধ্বংস হবে। সমাজ আমাকে বলছেন—তোমার যা ইচ্ছে যায় কর, বিলেত যাও, মুসলমানের হাতে খাও, সব কর—কিন্তু সামাজিক ভাবে জিজ্ঞেস করলেই বলা চাই, আমি কিছু করি নি তো! এ সব খুব ভাল, কি বলুন হরিদা?

হরিদা। তা ছাড়া, সমাজ কি করবে আর? লোক উচ্ছৃঙ্খল হবে, তা কি নেতারা এসে তাদের ধরে প্রহার করবে? মিথ্যা আচরণে কোনও দোষ নেই—উদ্দেশ্যটা যদি হয় খুব মহৎ।

শচীন। এটা আপনার নিতান্ত এড়োতর্ক। মিথ্যার সাহায্যে কোনও মহৎ উদ্দেশ্য বশ্মিনকালে সিদ্ধ হয়ও নি, হবেও না। বিবেকানন্দ বলেছেন—

হরিদা। সব কথাতেই স্বামীজি, পরমহংসদেব এঁদের টেনে এঁন না। তোমার এই অভ্যাসটা বড় খারাপ। এঁদের কথা তুলতে তোমার একটুও সন্দেহ হয় না। এ অশ্রদ্ধার ভাবটা আমি মোটেই গছন্দ করিনে। স্বামীজি কি বলেছেন? তাঁর কথা তোমরা কেউ বোঝ? এটা দেখছি, ছেলেদের মধ্যে এক ফ্যানসান হয়ে দাঁড়িয়েছে—সবারি মুখে বিবেকানন্দের কথা। তাঁর ‘বাণী’ কেউ বোঝে না, কেবল কুতর্ক করবার জন্তে কতগুলি বুলি আওড়ায়।

শচীন। আপনারও এ রকম ত্রিকালপ্ত হবার ভাণ্টা কেউ ভাল বলতে পারে না। ধর্ম, স্বামীজি, পরমহংসদেব, সব কি আপনার একলার? আর কেউ এ সম্বন্ধে কোন কথাই বলতে পারবে না?

হরিদা। পারবে না কেন—আমি কি নিষেধ করি? যার অধিকার আছে সেই পারবে, অনধিকার চর্চা করা ভাল নয়।

শচীন। মানুষমাত্রেরই অধিকার আছে।

অমিয়। আপনারা কি কচ্ছেন, হরিদা? এই ফণীবাবুর বাড়ীতে এত তর্ক, আবার এখানে—কেন, এ রোগ কেন?

হরিদা। তর্ক আবার কি? যে যা খুসি বলবে আর সব নীরবে সহ করে যেতে হবে এ কোন কথা?

শচীন। সত্যিই তো, রাত হয়ে গেছে। কি রকম বাজে তর্ক করে সময়টা কেটে গেল। কিছু মনে করবেন না হরিদা, তর্কের মাথায় যা' তা' বলে ফেলছি।

হরিদা। না, মনে কিছু করি নি, তবে তোমার আর একটু সংযত হওয়া উচিত। পাগলের মত তর্ক ক'র না আর কার সঙ্গে। আচ্ছা, এখন তবে আসি।

শচীন। বহুদূর না, হরিদা, এখনি যাবেন কেন ?

হরিদা। না পালাই, আমার কাজ আছে।

[হরিদার প্রশ্নান]

অমিয়। আচ্ছা, কি নিয়ে সমস্ত সন্ধ্যোটা তর্ক করলে ? তুমি

আবার ফণীবাবুকে তাকিক বলুছিলে !

শচীন। উঃ, বেজায় গরম বোধ হচ্ছে। সন্ধ্যোটা কেটে গেল, চল গোলদীঘিতে একটা চক্কর দিয়ে আসি, তা না হলে ঠিক মাথা ধরবে। তুমি যা বলছ তা ঠিক, এদেশে তর্ক করে কোনও ফল নেই আর তর্ক ছাড়া করবারও আর কিছু ত নেই।

[উভয়ের প্রশ্নান]

শ্রীকান্তচন্দ্র সেন।